

清

史

稿

清史稿

列傳

列女四

長山鋪烈婦

胡二妻

唐之坦妻曹

李 岸 妻 董

方引禪妻毛

林其標妻韓

馮雲勸妻李

曹邦傑妻張

林守仁妻王

張四維妻劉

李長華妾吳

周兆農妻王

陳國材妻周

吳廷 翁 妻 董 聘 妻 董 項 施 李 正 程 榮

于某妻蔡

張義妻李

黃敬升妻王

伊富阿妻鈕祜祿氏

張廷桂妻章

郝某妻單

陳廣美妻李

黃 邦 妻 董 陸

鄭宗墩妻陳

任 有 成 妻 陳

丁三郎妻

丁采芹妻孫

王如義妻向

狄聽妻王

林邦基妻

錢澍市妻汪

謝作棟妻王

繆文郁妻邱

黃壽椿妻管

馮桂增妻李

黃福先妻彭

方恠妻趙

姚森桂妻宋

惲毓華妻莊

黃鴻猷妻許寶元妻

尹春妻張

李氏

陳三義妻王

游開科妻趙

孫崇業妻金

張某妻田

張氏女

張氏女 滄州女

張氏

孫大成妻裔

楊某聘妻寧

孟黑子妻苑

苑氏女 苑氏女 苑氏女 苑氏女

蕭氏

黃氏女

吳氏女

顧氏

張氏

許會妻張

趙海玉妻任

殷氏

嘉興女

王某妻李

何先祐妻孫

邢氏

遷安婦 白鶴妻

林氏

洪某妻徐

敖氏

涂氏

吳氏 楊氏

趙氏 王氏 許氏

梅氏

張氏

秦某妻崔 王李氏 吳氏 徐氏

陳潛聘妻崔

朱承宇妻曹

陳有量妻海

樊廷桂妻張

李有恆聘妻楊 陳氏女 劉氏妻

宋氏五烈女

龔行妻謝 女巧

楊文龍聘妻孫

梁至良妻鄭 州廬氏妻

龔良翰妻陳

王均妻湯

李氏女 梁金

張元尹妻李 張氏妻

萬某妻曾

李維先妻侯

田氏女

馬某聘妻苗

高日勇妻楊

應舉兒妻

劉氏女

鍾妻某蔡

段舉妻盧

王某妻劉

張良善妻王

李青照妻張

姚際春女

王敦義妻張

陳維章妻陸

何氏女

謝亞煥妻王

張樹功妻吳

郭某妻李

趙謙妻王

郭氏女

阿氏女 沈山沈鼎 妻

汪氏女

郭氏女 郭氏女 周光琦女

黃聲諧妻王

白餘 孫惟叔 妻 高許氏 婦 阿叔 設明 吳有女 州某妻 吳 陳德先妻 李

曹氏女

劉廷斌女

張氏女

福順

陳氏婢

邱氏婢

董氏

任氏

盧尙義妻梁

白氏

王氏

秦士楚妻洪

張氏婢

楊氏婢

江貴壽妻王

張祿妻徐

任氏婢

郎氏女

王氏婢

徐氏女

丁香

江金姑

羅氏

隴聯嵩妻祿

者架聘妻直額

屬朝廷舊妻劉氏

安于磐妻朱

後妻田氏黃福田

李任妻矣

鄂對妻熱依木

索諾木榮宗母麥麥吉

聖宗女達結黃喇

沙氏女

嘉義番婦

施世燿妻節

長山鋪烈婦無姓氏不知何許人李自成南奔驅荆襄之民以從婦與其夫俱被掠行至江夏長山鋪其夫道殢婦僅餘一珥出以乞人求瘞其夫有少年應

焉瘞既竟欲強其婦從去婦入穴枕其夫慟哭觸額流血以土自掩曰乞併瘞我衆挽之不起日暮風雨至乃委去平明往視則血被面死矣衆因併瘞之胡二妻失其氏吳洞庭人婦父舟人胡二農也有母兄若弟皆別居婦與二曰吾夫婦各減數口食猶足以飽母有如母但一子不獨養又誰養乎夫婦忍飢養母時時具甘脆母喪求地以葬夫婦勤歲倍收始有居室而二病瘵鄉好鬼婦獨不信奔走醫藥二病甚婦曰我聞冀苦者生甘者死嘗之而甘二竟死無子婦計兄公一子叔二子詣叔曰其次爲後妣不可居數月兄公舉次子又詣兄公曰吾女三歲乳未盡今兄公舉次子天其欲使吾夫得有後乎兄公頷之婦歸語父貸百錢將祀其夫告立後其父欲嫁婦不許且罵之兄公亦中悔婦乃自經夫匿側時康熙五年十二月明年縣人黃中堅等爲歛錢與其夫合葬唐之坦妻曹海寧人康熙十五年秋之坦卒曹矢死治衣衾必有副食砒不死屑錢吞之又不死既歛復飲瀉吐下而解乃不食二十二日夜投舍傍池家人出之死矣頃復蘇曹謂其舅姑及母曰大人愛我乃苦我也於是復飲食操作

如常織自製衣一稱婢乞餘布不與家人竊議曰數尺布尙惜之宜不死矣及冬黃梅方花曹視而歎爲賦詩美其不落復不食至歲除出餘布縊之坦柩旁乃死李岸妻焦睢州人姑嚴織紉炊春皆焦任之岸卒方歛焦縊遇救比葬再縊再遇救乃操作如平時卒哭拜墓歸復縊乃死

方引禩妻毛遂安人父際可爲祥符知縣而引禩父象瑛官編修引禩病瘵自京師詣河南旣昏未三日卒家人聞毛許引禩死也閑之密一日登樓自擲墜地嘔血絕復蘇遂歸于方氏促爲引禩營葬久之地始定葬有日于是謂其人曰吾葬當同是日也遂不食家人喻之百端起辭祖姑及舅及母皆四拜終不食十九日乃卒時康熙二十九年二月癸亥朔距引禩喪十年

林其標妻韓福清人其標貧依姊居鬻養自給鄰媼乞之粟韓曰是必償其標病韓代鬻養垂簾簾自蔽少間析麻苧爲布以易米若藥其標語韓曰吾以貧累汝終且以死累汝吾死汝自爲計韓痛絕不能語其標死韓告其姊曰乞辦兩棺並覓一抔土俾夫婦相依盡散器物償隣媼遂自經

馮雲勸妻李武定人大學士之芳女李年十五適雲勸事舅姑謹立待竟日訴無怠命坐則坐命退則退之芳督浙江當耿精忠叛駐軍衢州傳語洵李獨謂賊不足平坦然無懼雲勸卒無子李方舉次女矢死遂不飲食其兄延醫手爲調藥拒不納越數日令侍者扶行傍柩側遽絕

曹邦傑妻張鎮寧州人邦傑早卒張爲文以祭曰嗚呼痛妾命之不辰也幼失嚴慈撫育無人形影伶仃莫可言狀幸得于歸夫子庶幾夙夜事之百年守之憶吾父擇壻時亦曰吾女幸矣終身之仰望者非壻耶如賓如友同心而同德者非壻耶私心自慶在妾尤深孰意甫歸故里遽嬰疾疾妾向之喜者化而爲憂忘餐廢寢所以身代而天不假年黃梁一覺羽化昇矣傷心哉夫子之人如金如玉夫子之文如海如潮而今已矣不可復見矣天耶人耶孰爲之耶禮稱未亡人妾不忍未亡也詩云之死靡佗妾惟知之死也九原匪遠妾必從之嗚呼淒淒惻惻踽踽涼涼拊膺呼號瞻望無將臨風瀟涕對景悲傷削骨代筆曷罄衷腸夫子乎其知之乎何不鍼輪少待使妾欲追而難跡乎靈其不寐庶鑒

妾心邦傑死三日張遂殉康熙三十七年事也

林守仁妻王侯官人守仁以優貢生客死京師無子女汀哥前室出也王矢死逾年守仁喪還王治喪竟一日爲汀哥製履成嘆曰生一日當作一日事因語汀哥曰母去兒無恐但歲時具杯酒一脔肉母當歸不相嚇也頃之午食竟入室自經藏香屑袖中解尸氣也

張四維妻劉四維錢塘人劉漢軍失其所隸旗四維父商於廣東挈四維以行劉父官湖州知府見四維幼慧因與論婚四維父喪其資斧而四維長多病遂跛劉父母欲別擇婚劉矢死父母莫能奪乃召四維就婚劉既失父母歡姊婿達官子相侮劉勸四維挈以歸劉辭父母奩具一不取勤苦作畫刺繡易薪米四維亦力學舉于鄉康熙五十九年四維試禮部不第卒於京師劉聞遂殉焉李長華妾吳長華鄆城人吳封邱人幼孤爲人賣入倡家矢死不從其兄贖以歸爲長華妾長華以選人客京師居八年貧病死其友檢討孫勸爲具飲吳飲鳩勸往救誠母死待長華子迎喪後十餘日長華子迎喪至知其事亦勸母死

且將以其子爲之孫吳卽夕自經死勸葬長華廣寧門外眞空寺側以吳祔周兆農妻王長沙人兆農樵于山大風拔木被創死遺腹生子母家閔其貧勸改適王拜姑泣而言曰兒不孝敢以呱呱者累老人語未竟大慟姑知其且死夜與俱寢稍寐聞有異呼家人踰戶入火之見王頭繫于牀右手握拳爪陷掌左手指牀上兒死時年十九

陳國材妻周江甯人居揚州歸國材逾月遽卒周日夕居喪次誓從死籍遺財授其族子曰明年寒食以一卮酹我夫婦其父往慰喻之周日兒無舅姑無子客居無所依義當死父勿誤兒然兒死不忍傷肢體遂吞金環二不死時周顧甚餌大黃冀暴下死反下所吞金環乃不飲食七日猶坐語又數日眸陷欲枯目光注國材棺不轉兩手據席爬搔席草寸寸碎裂不飲食二十日雍正九年三月癸未卒距國材死五十有一日縣人爲葬孫大成妻裔墓側其先又有烈女池霍四家比立如鱗次吳廷望聘妻池江都人廷望從軍戰死廷望父欲以妻其幼子使其從母喻意池不可自經李正榮聘妻霍甘泉人生十九年事父

母孝許字正榮才十日而正榮卒霍號慟自殺二女之葬提督學政右中允楊中訥爲之銘曰蜀岡之巔平山之側鬱乎蒼蒼憑高西望而歎息曰有同縣二烈女此其幽宅裔自有傳葬在池霍後又有項起鵠妻程亦揚州人程嫁三月起鵠行賈死廣西計聞程自經州人葬其側合爲祠號五烈

于某妻蔡名貞仙金壇人年十九將嫁而婿病卜者言迎婦吉貞仙母難之貞仙請于母曰彼欲已病而違之非義乃行而婿病不起及歛納釵一釧一於棺自經棺旁救不死諷姑爲翁置媵姑從之且使主家事忌者譜之因辭于姑忌者遂言是且有他志乃矢死取所讀書所爲詩詞盡焚之釵于髻釧于腕旦起襲故衣問安于姑所辭色如常時午侍食既撤入室縊時乾隆二年六月壬戌年二十五貞仙有從父嘗過視貞仙問曰聞舅姑以譜常挫汝有之乎對曰否古賢婦未有訟其舅姑者即死母有他言

張義妻李交城人義坐罪當斬免死遣廣西義寧李與偕義死遣所李具棺以歛以遺金上縣至夕呼鄰媼共宿俟其熟寐赴水死時乾隆五年九月辛未縣

具其事上巡撫巡撫以聞下禮部禮部議殉夫者令甲有明禁惟李以從夫罪遣孤踪殉節非激烈輕生比請旌表得旨依議

黃敬升妻王崑山人敬升貧客授王佐以積食不足製辟瘟藥鬻諸市敬升病疫一日門不啟鄰人壞垣入視敬升死于牀王死牀下兒臥地號胸繫王書略言貧不能飲其夫食製藥紅砒以殉冀有側隱者飲夫育兒身填溝壑不恨有士人爲飲其夫婦將兒去育以長

伊嵩阿拜都氏滿洲鑲黃旗人妻希光鈕祜祿氏正白旗人總督愛必達女也伊嵩阿爲大學士永貴從子早卒方病時希光割股進終不起許以死愛必達永貴共諭之誓畢婚嫁乃殉爲伊嵩阿弟娶嫁女妹及二女次女行之明日自縊死張遺詩於壁略謂十載要盟此日當報命乾隆四十六年三月事也永貴疏聞高宗爲賦詩旌其節

張廷桂妻章名孔榮廷桂常熟人章秦安人廷桂父爲吏陝西初娶魏其父宰秦安廷桂從焉既歸避事復遊秦安因贅于章居八年事解乃以孥還廷桂貧

恒出客游卒於撫寧喪歸章爲營葬既窆將自投穴中爲家人所持章一女字
催鳳廷桂從弟廷梅許生子爲立後乃依廷梅居廷桂嘗入貲牒授主簿或購
其牒章曰吾以貧鬻牒罔國家罪也况夫名其可二耶遂焚其牒既終喪復自
經家人覺解之次日既夕赴水死死時爲絕命辭數章詞旨哀惻其卒章曰憶
往事兮雙淚沾巾想當年兮妾病沉昏感君愛兮信誓殷勤云妾歿兮君必亡
身嗟今日兮命不由人君先亡兮妾豈偷存痛萬里兮生會無因輕一命兮地
下從君求神明兮引我孤魂覓天涯兮不惜艱辛得伴君兮死亦歡欣十七年
兮夫婦深恩食糟糠兮敢怨君貧中路訣兮命蹇時屯喪葬畢兮不死何云傷
幼女兮失母誰親死爲君兮此外奚論又留書與廷梅曰初聞訃即欲死念無
後無人主喪葬今服除死更無餘事前議叔生子爲立後母証我家貧止田十
四畝當以十畝與所後子四畝與催鳳遺十金爲我埋先夫塋次催鳳旋殤廷
梅亦不爲立後後二十年縣諸生柏渭吳慶長等始爲合葬

郝某妻單永寄人郝奇醜眇小醜且跛一目口不能言御小車遂呼曰小車而

單美鄰婦恒嫻焉單曰夫可憎乎吾命也請勿再言單躬紡績養舅姑育子舅姑死嚮所居破屋以葬嘗數日不舉火族人憫之予蕎麥數斗製餅以嚮分其餘以飽乾隆五十年歲饑單爲鄰婦佐女紅貸餘食食夫及子逾年夫疫死子亦殤單裂席裹尸以木杙掘坎瘞焉杙折手捧土瘞畢血殷地乃號曰天平單氏事畢矣而猶生乎坐破窯中餓數日死年二十六族人瘞之夫側里稱賢婦墓云

陳廣美妻李河內農家女也生二十四年而歸廣美廣美已病李與異室居侍疾甚謹事舅日具饌甚恭閱三月廣美死母往視之且語之曰兒雖嫁猶處子也何患無佳婿李誓不更適葬之明日出厨刀屬舅礪焉曰爲翁作剗虞其鈍也其舅竟礪以授李李闔戶其舅知李且死排戶入見李猶立右手握刀首墮負于背幾不屬血從鬢間溢殷地其舅疾呼族鄰畢至其母亦至乃仆李死嘉慶五年四月丁未賀邦達妻陸震澤人待年於賀氏邦達病舅姑用卜人言使成婚逾月而邦達死或語其舅姑婦雖婚猶處子也蓋爲擇婿陸聞集族姻出

拜誓母貳居三年語姑曰我夜數夢吾夫豈魂魄常從我耶遂入室自縊死時嘉慶十六年四月辛酉陸年十九

鄭宗墩妻陳名淑定長樂人宗墩客他縣昇病歸卒無子陳求死父諭止之陳力緘葬姑及宗墩舅以居隘命歸依父嘉慶二十五年父卒還省舅退告叔弟曰兄沒十二年矣未亡人懼傷吾父心久而不死今已矣舅老有叔在叔能以子爲兄後兄其瞑乎遂繼任有成妻陳蕭山人有成無昆弟賈諸賢卒亦無子舅姑命歸母家將徐奪其志陳矢死不可力積貲爲舅卜妾吳逾年而有子舅姑卒陳與吳居育夫弟錢儀吉爲作二陳傳謂當死生危苦之際進退合度得禮意云

丁三郎妻失其氏宜興人嫁逾年夫死不哭亦不拜家人莫測也後四十九日旣奠婦出就案前立視其主久之拜拜時若呼三郎遂伏地不能起掖之則已死

丁采芹妻孫震澤人嫁半年采芹病瘵舅姑謂婦命凶詬罵之孫飲泣脫簪珥

具湯藥采芹病日篤謂孫曰我且死所不能瞑目者爲汝耳汝無子家貧母家亦無可依當奈何孫泣曰我念之熟恐戚君故不敢言人孰不死死貴得所當先待君地下耳采芹垂泣不答孫乘間自縊道光六年四月也采芹乃扶病而拜曰從我于既死不若殉我於將死烈哉三日采芹亦死

王如義妻向涪州人幼能爲詩文如義農家子向恆勸之讀道光十六年如義暴卒姑喻之嫁矢以死舅病爲刲股家益貧將強遣之二十三年三月戊申自沉荷花灘死將死爲絕命詩十首其序曰妾涪陵向氏女適王氏未一年而夫即世昨歲翁又不幸孤苦煢獨人勸以非禮衣食事小名節事大惟一死以明志夜題詩十首藏笥中他日閱妾詩毋累阿姑也及入水粘一紙橋柱書五字曰名節江中見死時年二十五

狄聰妻王名甥桐聽溧陽人道光九年進士官至廣西道監察御史王江陰人十九年七月聽卒官八月子驥殤九月丁巳王縊王幼承父蘇教通經史大義能詩將殉作書告聽諸同歲略言夫亡當即死諸君俱言撫孤重故未敢爾孤

又天復何言念兩世單傳不可無後今已立後可報舅姑夫子地下王嘗撫從女年十七已許字留金屬遺嫁又諭所後子期明年以喪還葬與前母三棺同穴以殤祔並令斥資攸祖祠成父志書末題曰我自歸家去人休作烈看康熙間錢塘林邦基妻曾所爲絕命詩也曾名如蘭邦基卒曾立其兄子爲後葬舅姑畢其牒上縣請死知縣慰止之後十日題辭吞金殉

錢漣甫妻汪武進人善女工所入足自給而漣甫博傾其資其姑嚴雖寒餓不敢告也夜風雪家人皆臥薄絮衣篝燈守後戶待漣甫嘗以除夕跪而諫無更博漣甫爲少止後客死餘干汪請立後所當立者不可汪意乃勿復言葬畢自經死未死前一日以十盃致某醫曰我爲人無所受恩惟是人嘗診我以是償也

謝作棟妻王孟津人王家白鶴鎮作棟家南朱村作棟卒王將殉祖姑及舅姑勉以撫孤王朝夕奠必抱其孤拜哭涕如雨祖姑聞之爲輟食王乃飲泣不敢聲喪終其孤殤祖姑亦沒王歸訣父母父母慰諭之道光二十二年四月辛巳

作棟死三期先日王哭于墓誓死脯盡以衣物與二女妹夜中縊晨衆踰戶入一鐙置高處照屋梁板障其外王內衣皆密紉貌如生

繆文郁妻邱吳江同里人同里有敝俗歲二三月祠劉猛將輿以出少年傅粉墨爲婦人參錯儀衛聞文郁故磨豆家傭與其役曰跌過門女伴呼邱出觀邱以爲恥恚闔戶文郁歸戒母更出越宿文郁病或恫以神怒且死邱曰聰明正直爲神豈以茫昧致人死者吾夫未即死即死吾與俱死耳數日文郁竟死邱迎母與居三日語母入市市楮邱自縊柩側

黃壽椿妻管壽椿江蘇華亭人管陽湖人父光烈母林皆死寇壽椿官江西德安典史光緒二年卒時壽椿父如琳官浙江上虞梁湖巡檢管將壽椿喪挈子女以歸至曹娥江距梁湖一日程遣子女先行謁祖父母管飲藥死

馮桂增妻李桂增臨朐人李肅州農家女桂增從左宗棠討叛回馬四軍其地納焉桂增會師新疆李留肅州與部曲諸婦居李御諸婦有法度諸婦憚之若部曲之事其帥光緒二年正月桂增克瑪納斯城軍寡爲賊所乘戰死李方有

身日夜哭既生子逾年殤桂增喪還李迎奠喪甚慟須臾仆不語視之死蓋先時已仰藥也黃翥先妾彭翥先鍾祥人彭貴筑人先爲田興恕婢興恕戍新疆寄家秦州翥先方知秦州得彭以爲妾光緒二年宗棠駐軍秦州翥先爲主計四年卒彭悉發篋以衣物屬翥先子吞金死

方恠妻趙陽湖人祖母方節婦父烈文嘗知易州有文行歸恠食貧持門戶光緒四年恠客遊遽卒趙方有身烈文迎以歸徐告之慟絕首觸牖將死家人共寬喻之既免身生女趙曰生女亦善使我無繫戀也後八日自經死

姚森桂妻宋秦安人森桂卒宋入廚下自剄血自咽出汨汨姑入視右手握刀猶力作再割狀母至束以帛乃能語曰死已決毋緩我引母手掩口鼻又解帶使縊母手顫不可任觀宋狀至慘怛乃飲以毒毒自創溢但聞宋咽中若曰斫我斫我久之乃無聲遂死

惲毓華妻莊陽湖人毓華死莊飲藥殉毓華弟毓德妻許毓德死許絕食殉毓華姪寶元妻袁寶元死袁先服毒急救之復絕食三日以殉世稱惲氏三烈婦

曲承麟妻袁承麟濟陽人袁名桂程遼陽人嫁未百日承麟卒袁仰藥殉

尹春妻張歛人初爲黃氏婢名桂喜主婦程知書嘗與諸娣姒說古列女事桂喜竊聽輒稱羨旣嫁而婦遂矢死詣肆求毒藥肆以佗藥予之飲不死市櫬臥其中主婦泣喻之對曰桂喜聞主母講列女時意已決不可回也卒不食死李氏高密人夫嘉猷失其氏嘉猷惑于讒娶不與同室及病李奉事甚謹禱于神請代嘉猷聞而悔遂死李自經以殉

陳三義妻王掖縣人王未行病而瞽其父辭于三義三義曰吾聘時未瞽也聘而瞽猶娶而瞽其可棄乎娶三年王曰良愈三義尋卒王曰夫不負吾吾豈負夫遂縊

游開科妻趙馬邊廳人開科貧贅於趙趙有母及兄皆厭之趙脫簪珥別賃屋以居食盡不貸於母家一日趙還省母方食開科至趙推食與之母及兄遂開科禁趙母歸且言此餓莩死何患無家趙縊死

孫崇業妻金赤城人崇業嗜酒不治生金勸之不聽順治中歲祲崇業計鬻金

陽語當偕詣戚屬金察其詐曰汝乃忍嫁我我嫁必且死然至汝家二十餘年詎忍忽然行盍沽酒爲別崇業出沽酒金抽刃斷喉死張某妻田萬全人夫游蕩田屢諫一日歎曰我生不能勸死或憶我言因仰藥死死時猶呼其夫勸改過

張氏女婁縣人農家女嫁魯氏子姑與夫迫使爲汙行不從篴楚凍餒凡三四年志不變康熙二十六年三月其夫將刼以佗往夜入萬安橋下水中死又有湯氏女奉天人有娼家爲客娶之使爲娼篴楚困辱卒自殺滄州女不知其姓名黛城年十五鬻入娼家使應客不從撻辱之大罵娼家支解之棄尸于河張氏郡昌人康熙十三年耿精忠爲亂張之夫熊應鼎將從賊張諫勿聽質裙沽酒以飲且勸終不可乃告于其族矢死應鼎入于賊張自殺

孫大成妻裔江都人大成母姣二女嫁而歸皆與縣吏通迫欲汙裔裔告大成俱縊救不死裔歸省母告母狀持母袂哭臨去檢母奩得青白線各一束因曰兒必不辱母俄縣吏宿姑室復呼裔不應姑冒亦不應縣吏醉裸而謀窗下裔

以青白線綴上下衣復合爲絙縊姑覺不救遂死鄰知其事咸泣拜裔尸或語
侵姑姑反脣衆譁以告官官庇吏旌裔葬平山堂右岡而不竟其獄後數十年
縣隸以事辱裔兒子死于水裔兄痛子亦死楊某聘妻章字原姑秀水人年十
九縣隸請婚父不許許楊氏縣隸與其徒謀于門誣原姑與有私原姑夜縊死
縣吏欲寬隸獄上巡撫持不可乃絞隸旌原姑裔死康熙六十年四月戊申原
姑死嘉慶六年九月甲午

孟黑子妻苑黑子大城人苑東安人其姑素無行會永定河決工役大集賣酒
隄上強苑與偕苑不從窘辱之姑與惡少入婦室飲婦終不可犯姑益怒婦度
終不免自沉死夫行求其尸四日得之武清境又四日乃斂方盛暑尸未朽也
北塘女子業磨豆爲腐母迫爲娼新河藍某妻失其姓姑迫爲娼皆自殺武清
芮氏女秉貞寧河樂某妻左並以姑迫與惡少瞞自殺

蕭氏靈州人爲張文彩妻文彩有友悅蕭美欲汙之蕭力拒友懟蕭譖諸文彩
謂蕭不潔文彩信之結蕭歸寧與其友共殺諸途後事雪雍正十二年旌

黃氏女昭文人嫁張氏子爲縣小吏其母有所私迫女從之日鍾楚或謂女盍歸女曰女旣嫁安歸待死而已乾隆十六年夏方暑姑與所私裸而飲女避所私起持之女大號曰奴敢汚我持案上酒器提之姑怒批其頰復榜掠之夜半女入井死吳氏女震澤人喪父母方六歲字李氏而待年焉稍長美李氏子行賈久未歸姑悍私于里豪里豪啗姑金欲得女女勿從姑撻之極楚鄰嫗問其故女不肯言當暑浴姑納里豪于室鍵其戶女呼不應挾剪拒創里豪里豪持女褰衣去女求死姑操巨鎚撻之女引剪自割未殊鄰人戒其姑毋急女女與鄰女款曲如平時哺啜粥盡一甌鄰女謂不死矣夜漏二刻自溺門外溪水死時乾隆三十七年七月丁未

顧氏泰州人夫張世英日誨顧淫顧不可或貸世英錢世英陰欲顧與私沽酒飲貸錢者嗾其母呼顧出不應與之酒覆杯慟貸錢者亟去其母搯顧吭幾絕鄰里咸憤訴于州世英乞悔過以顧歸與其母益日夜迫之顧飲酒不得死乾隆十六年十月戊戌世英語顧冬無衣盍如吾言即得錢衣汝顧曰我甯死不

辱世英悲夜扼殺之年十七張氏丹陽人夫陳彭年嫁十年矣彭年貧欲嫁張
張涕泣不應給使出而密使媒從張覺之號慟求死避卒以告官官答彭年令
張還母家張曰我適陳矣死生以之彭年益迫張張度終不免從容言曰我無
如何今當聽爾起隨彭年走出村塘水方盛張躍入水死死之日爲乾隆十九
年六月戊辰

許會妻張潁州人姑姣而虐惡張端謹不類日詬且撻張事姑益恭姑病刲股
以療姑虐如故姑與鄰寺僧通欲亂張姑匿僧室召張入而出鍵其戶張大號
僧遁去翌日自沈于井有司捕得僧論如律鄉人裂僧尸以祭張趙海玉妻任
名環汝州人姑故與鄰人通夜半挾刃入任室詬而免亦井死年十九

殷氏天津人爲同縣邢文貴妻文貴故無行其母趙姣文貴初娶于以貞慎不
相入出之復娶殷殷貞慎尤逾于趙惡之與文貴日捶楚沃以沸湯施燔灼焉
體盡潰有司聞使吏就視殷拒不可旋卒有司收趙及文貴論如法

嘉興女失其氏嫁賣酒家王氏子姑當壚習與酒人姣甚女不應乃裁抑不使

飽縣中李氏母故大家女聞賣花媼言女事怒女有志輒令媼市胡餅畀女一日見女餓憊甚而儿上置養果媼怪女何棄不食女曰李夫人飽我哀我志也此物西家以餌我我有餓死耳豈可食乎李母病且死遺錢十餘緡周女女感泣語媼我終不負李夫人望惡少艷女久嗾姑將脅以威女漸聞之乃請于姑代當壚姑喜授女戶鑰數日女夜啟後戶投水死乾隆二十年六月事也

王某妻李字黑姑天津人姑不貞與鹽運使隸有私計欲并汚李隸與姑飲役李李恥之恒不如姑指姑以他故詈且撻待隸爲之解復示意李終不可而隸意未已李枕側置刀以自衛姑逐其子出夜持被就李共寢夜半啟戶納隸隸迫李李呼姑掩其口取刀自剄未殊母來視之復撻語其故並言方自剄血溢不知人漸聞隸語姑當言夫婦相爭詎自戕宜無知者越三日乃死其兄告官答隸不竟其獄道光六年七月事也

何先佑妻孫桂陽人先佑父在時爲先佑求塾師授之讀未幾喪父其母以家政屬塾師因私焉孫既歸嘗晨謁姑塾師在其室孫趨而避塾師與姑謀併亂

之塾師出孫入諫姑曰家雖貧粗有門閥翁勤苦終身不得意所屬望者先佑姑念翁與先佑勿復近塾師姑慙戒毋泄孫曰婦所言爲門戶耳雖先佑不敢第願姑終念婦言塾師既與姑謀遂屢挑孫孫以告姑又諫姑終毋納塾師入孫室孫大詬塾師陽避孫欲還告其祖忍未發姑陽出塾師復入孫室潛抱持之孫號奮擊先佑入塾師乃走孫傷於脇遂自經死時乾隆二十九年三月明年獄上斬塾師徙其姑新疆

邢氏字福溶縣人農家女也而有容色嫁袁顯旺姑姣羣姦聚其室驚邢美挑之不從其姑誘且詆邢若爲勿喻也者謀益急夜出將赴水風失道遇同村人送還父家父愿與復至袁氏羣姦迫其父使其狀曰女再逃杖死夜二鼓羣姦縛邢裸撻數百邢有娠不勝楚求滅燈死不恨羣姦縋邢於梁而撻之益毒五鼓燈盡邢死使興旺創其頸若自戕官捕羣姦論如法

邊安婦不知其姓夫行賈翁耄姑私於傭傭計並汗婦稍近婦婦色甚厲乃與其姑謀噉翁汗婦婦不可遂噉翁殺婦絮塞口杙椽下體死白銘妻尹亦遷安

人鎔出爲優姑有外遇迫婦絕飲食日啜米泔逾月姑縛尹以熾鐵烙下體尹號擊其首髮皆然一目裂遂死

林氏平湖人嫁顧大家乍浦湯山麓顧大母故娼也惡少往來其室強林具茗不可母慙林與諸惡少謀必欲并污之林竊出赴海未至值鄰女送之還母益仇林與大日共笞之靳其食不令飽居年餘爲嘉慶九年正月方改歲惡少至羣飲林復竊出赴海既日受笞且久饑行不前大追至執以歸母遂欲殺林搗以重器腰脇俱折復砲烙其下體是月丙戌晦林死事發論大如律

洪某妻徐金谿農家女也姑與兄公有盜行徐至未逾月察得之大喊脫簪珥界洪屬遠行賈以避屢諫姑姑不納乃自經

敖氏涼州人嫁駐防涼州旗人四十九四十九有友相狎丐與敖通四十九許之假以衣夜入室敖聞語辨非夫也奪戶出友遁敖誓四十九俟其出自溺水盟中死

涂氏梁山人嫁甘克桂克桂游蕩破其家涂以女紅供日食克桂負嵎賈錢將

以涂償一日克桂從涂取故衣易錢以飲醉歸涂泣克桂攔其頰曰行且霽爾涂曰吾矢死不往克桂撻之兩晝夜不已涂自經死

吳氏彰化人嫁康氏子姑不貞欲併亂之吳不從乃效治囚法榜掠之無算卒不爲屈刺刀其腹死道光七年事也楊氏江都木工女嫁曹氏子姑迫使爲汙行楊不從乃絕其食鞭之至累千造諸酷刑榜掠無完膚創重死鄰以告縣吏笞其舅及夫葬諸梅花嶺下

趙氏桐城人夫同縣孫某洪秀全兵將至其夫降受署置咸豐十一年秀全兵破桐城其夫戴黃巾被黃袍乘馬迎趙趙望見大慟曰汝非我夫也父母遣我嫁乃諸生孫某非作賊孫某也且汝既讀書爲士人豈不知孫氏望族文武仕宦不絕而失身降賊意氣揚揚自得我不忍見也起投塘死子數歲從之下同時又有王氏合肥人夫繆錫疇將降秀全王力諫不聽自經死許氏名領姑歎人夫亦縣諸生成豐十年賊至其舅將降許泣諫勿納亦自經死其舅後忤賊舉家皆爲戮

梅氏名蘭如不知何縣人嫁夫不肖欲携以爲豪家奴梅不可又使出乳人子爲傭亦不可夫引僧入其室梅力拒鄰以告官官笞僧及其夫夫怒梅甚窘辱捶楚無不至又徙居木工家夜諸惡少入室將強汙之鄰復以告官官未即聽其獄梅自經死

張氏武進人字沈盤德父母卒大母老待年于沈盤德父故無賴屢挑女女謹避之又令歸省張之戚有與沈鄰者女大母偶過之女聞得問問安否因密訴其事嗚咽曰兒命苦惟有死耳又嗚咽久之屬大母曰勿揚于人也未幾里中爲優舉家往觀女獨在盤德父驟逼之力拒得脫度終不免自經死

秦某妻崔陽高人夫惡崔諫勿聽撻辱之踰年坐罪流徙懼見侮先殺其子而自殺李某妻管南平人夫不肖管數諫累被撻辱逼之嫁奔還母氏卒露于富家乃自殺王某妻徐東鄉人姑夏早寡而子無籍夏戒勿聽徐規之輒鞭撻死夏謂徐夫無恩可嫁徐不去

陳潛聘妻崔名秋宣德人秋大父與潛父希孔同官于肇慶秋大父卒官因迎

秋至官廨而潛在里阻亂未昏順治十年希孔罷官還道高明遇仇家婿焉繫秋及希孔二妾將汗之秋罵甚厲仇生瘞秋以蜜傅其面引蟻嘜之秋至死罵不絕二妾亦生瘞死

朱承宇妻曹承宇無錫人曹武進人皆農家也生二子一女而承宇死承宇弟迫之嫁曹以死拒徧告鄰里戚族乞言于叔得毋嫁承宇弟不許請終喪不許請及大祥不許乃請得見其姊許之曹夜挈兒女詣姊家曰我初不欲嫁今已矣特不能纍纍然抱兒女作新婦暫累姊三日後當相取慎勿告吾叔姊謾許之兒啼索乳曹泣曰癡兒母豈能長乳爾耶辭姊出復還視兒女再三屬姊姊曰三日耳何言之數乃去哭于承宇墓還遂縊姊往哭之目猶視許育其兒女以長乃暝及歛左臂創未合蓋承宇病時嘗割臂也父爲訟于縣罪迫嫁者陳有量妻海銅山人有量儒家子貧無食轉徙常州居逆旅資盡惡少矚海年少與有量游且周之時其亡挑海海嘗之走是時漕粟至京師其舟謂之糧船主者皆豪猾惡少緹海于主者亦引與有量游招使佐會計且謂舟行當經徐

州蓋以孥歸有量以告海海問孰爲引致則惡少嘗爲所挑冒而走者也謝母往惡少使其曹訟有量逃人有量懼乃以海入其舟海入舟日獨處主者使有量有事于近縣而夜就海強抱持之海號擿其面猶不釋大呼殺人舟人盡驚起始得免即夕自經主者藏其尸積粟中賄舟人有需師藍九廷者怒海死卻主者賄告官乃按誅主者及惡少常州人葬海于南郊會者殆千人

樊廷柱妻張襄城人廷柱早卒張奉姑撫二子縣中有無賴子二倚兵籍爲暴斃張欲汙之康熙五十五年四月戊申日方午姑與其幼子出郭獲麥二子就塾二無賴調張獨居共入室張走避一直前持之一扼其吭嚇以死張不爲屈取菜刀搥其面爲所奪入室就牀側解佩刀刀長操其室方出又爲無賴奪遂共曳張使伏張輒躍而起屢仆屢立掉其髮縷縷脫呼益急二無賴度終不可犯一拾所解刀斫張額張仆一取菜刀斷其喉遂死鄰見二無賴出自張室衣漬血告官縣吏憚兵家子欲坐廷柱弟宣民大譁乃以疑獄上後四年河道周銓元署按察使察獄辭詫曰此何名疑獄城中殺人非荒野日午非昏夜且殺

人者有主名此何名疑獄下縣逮二無賴一前數月發狂死將死自承殺張一戮于市

李有恆聘妻楊偃師人少喪母十七未嫁父爲隸歲暮猶行役一夕大雪同村有屠者持刀入女室女堅拒被殺質明其父歸見女死咽斷左右手數創右手持衣帶不釋出戶外逐雪上血跡至屠者家得刀於牀下屠者死獄中陳某妻不知其姓吳人夫圻者出就傭鄰有酒人過調婦婦語夫夫漫授以刃曰彼來汝殺之復出就傭酒人夜排戶入婦擲刃酒人拾刃婦洞胸死兒號鄰婦入視一村皆集獨酒人者不至求之方避入鄰村告於官誅之里有老塾師曹叔素盡出所蓄金爲建祠圖像以祭劉塋妻李太康人姑令采菽鄰村子持鎌過調婦婦力拒舉鎌刺胸死越數日鄰村子疾作持鎌趨采菽所自言殺婦狀乃執以告官兩家故有連賄罷訟逾年疾復作持鎌趨采菽所扶胸斷喉死曲氏女字登永寧人年十三父守瓜母呼女鮐之父令女代守鄰園叟五十餘望見女獨坐柿樹下前調之女怒罵叟執其臂女躍上樹叟攀樹曳以下女號益厲

乃走女歸訴父母曰兒臂爲人執不爲急湔洗何能立天地間乎明日持刀奔至鄰園叟門外自剄死目瞠視立不仆血湧出不止叟出戶見之反走提廚刀至女門外踰亦自剄死

宋氏五烈女肅寧農家女也父佃于勢家爲莊頭其主視若奴僕生女四女孫一長並有容色其主將迫使爲媵五女一夕自經死以白縣縣憚勢家不敢上聞葬而爲之碣曰宋氏五烈女之墓康熙三十四年事也東安陶子明妻張解萬有妻劉清苑戴國妻鄭爲營兵所挑不從見殺通州邢德重妻王爲營兵所挑入井死

裴行妻謝興化人縣被水行挈妻女至鎮江屑豆爲腐以活鎮江故屯軍有江甯無賴子入軍籍窺謝及女有容一日行出挾羣少過之遂挑謝謝倉皇號呼無賴擊謝仆女奔救又犯女急走避無賴僞爲行券索償因毆行行懇縣官官答行且速謝謝持女泣曰以吾故陷汝父吾死不足恤獨憐汝耳女亦泣曰母死女何能生即生且蒙不潔願相從得仍爲母子相持而慟雞初鳴投水死女

名巧

楊文龍聘妻孫字秀錢塘人秀年十五待年于夫氏文龍從父行販秀依姑共處鄰家子無賴入室牽其衣秀囁其指乃去方暑秀晚浴鄰家子穴壁持其足秀驚起白姑姑告諸鄰或引無賴謝秀提以茶盃中他人其人亦無賴相與噪于門言終當致之秀慮不免密紉上下衣出視姑膳膳畢復淪茗進乃入室飲酒死巡撫聞按誅無賴爲文以祭

梁至良妻鄭至良海陽人鄭澄海人至良卒其兄爲諸生迫鄭嫁鄭遺腹生子家有田八畝鄭悉推與至良兄自分畝許力種溉傭于羣從姊姒間縫紉春磨得米奉姑食子女歲大無至良兄憾其不嫁夫婦衆撻辱之鄭念不可留夜檢故衣付其女曰明晨母當去若善視幼弟明晨跪姑前泣告當還母家徧辭羣從諸姊姒遂行至廣濟橋仰天呼夫名三投韓江死雍正六年六月庚辰朔也郭進昌妻李永甯人進昌卒矢不嫁與女若婿居進昌弟貪而狡計嫂年三十許尙艾嫁可得錢乃詣李微諷之李怒叱使去進昌弟與族子謀鬻女爲富

家妾約以騎迎至日進昌弟入李室將強扶李出婿與女訴鬪李忽改容戒勿
譁入室作妝以小刀薙髮遂上馬去至王范鎮李大呼袖中出薙鬚小刀刺喉
喉斷血噴十餘丈墜馬死鎮人大驚共執進昌弟問狀呼婿與女訴官論如律
龔良翰妻陳葉縣人良翰卒孤女才三歲後母欲嫁之陳依叔父居叔母有弟
窺陳美夜持刀入自牖陳與隣女宿盜至推鄰女牀下徒手捍盜指斷目傷身
數創卒不得亂叔父聞撞扉盜崩出陳息僅屬隣女出牀下血淋漓被體叔父
心知盜其婦弟也告官置諸獄陳遂不食叔母助以育女乃復食既女殤而縣
吏鞠盜獄未定若有疑于陳召庭質雍正七年五月辛亥陳自經死後五年縣
吏坐罪去事乃白

王均妻湯均吳人湯寶山人湯故富均贅於湯湯父母遇之薄均客授湯治鍼
術以養父母母稍久有田十二畝雍正十年秋七月海潮大至均夫婦倉卒緣樹
均攀枯枝折溺焉湯父母愁不問湯使僮午求均尸三日始得之被髮徒跣赴
尸所哭幾絕既歛湯父母欲火之湯不許瘞均田中湯遺腹生女名之曰潮音

湯父母迫使嫁與至湯麻衣腰絰抱潮音繞塲號衆劫納輿中湯父母奪潮音將抵諸石午自旁募得之歸諸王氏衆卒昇湯去湯哭數夕不絕聲守者稍怠自經死湯父母以疫死計于王奔湯柩所死家居數年慮事泄悲其人焚柩午自詭湯氏使往視既焚骨入罌午易以空罌得湯骨瘞均側潮音亦前殤附焉李氏女名蘭香長安李氏婢也李氏有僕私欲妻蘭香未敢言會有客至治具主母命蘭香取其樓上僕從登扃門就擁之蘭香號持之堅卒不從僕慮事敗以麻稽刺其腹深數寸遂死翠金不知其氏平湖施氏婢也主客授于外翠金侍主婦不苟言笑鄰有無賴夜持刀踰垣入翠金呼無賴慄以刀翠金曰我不畏死罵愈厲遂見殺

張元尹妻李永寧人生女而元尹卒李以己有色自晦不踰閭居十餘年其家僕夜持刀踰牆拔戶樞入其室李聞其聲僕也罵萬逆僕出刀曰不從殺汝腹李奮頸呼曰截截聲未斷已殊手足擊牀震女驚呼家人縛僕送官自言殺李狀論如律所居村曰太原村張檢妻顏其同縣人幼聞人言太原村張烈婦輒

鳴咽流涕長有色歸檢出應試客作伺顏夜省姑懷刀潛入室匿桁下人定出登牀顏驚曾以刀罵起奪刀割掌罵益急迭刺胸臂肋腋十餘創死客作夜走還其家捕得坐誅

萬某妻曾南城人萬愚甚有父不能養曾力女紅食其舅且自食萬嘗忤其父告官縣隸至見婦美乃爲計出萬且引使爲隸假以錢招共居曾謂夫曰汝與彼不相識何以能得此此其意蓋在我也辭母往隸怒索錢曾有女纔四五歲隸曰汝無錢當鬻此女以償萬乃鬻女曾至所鬻家抱以歸且罵隸隸益怒告官謂曾忤其姑官令逮至撻其面數十是夜曾抱其女赴水死曾嫁時姑死久矣李繼先妻侯忻州人奸民謀汗之不遂誣以不潔訟之官官不能白侯自裁訟庭

田氏女巴縣人幼喪父母依兄嫂以居年十五美有無行生欲挑之鄰有優人妻與謀要女過其家強以酒欲汗之怒詈脫歸告兄兄訟于縣生丐縣中有力者語縣吏誣女有汗行縣吏撻其兄而釋生女忿自殺

馬某聘妻苗甯肅人早喪母將嫁謁外祖母止宿鄰僕闖其美夜持刃排闥入女驚呼傭婦起沮僕殺之外祖母奔救又殺之客作聞聲持械入與鬥刃頓取莖刀支解之因持女女呼益急莖刀擊之創徧體死時乾隆三年六月己亥高日勇妻楊鎮番人口勇傭于馮氏與楊俱馮挑焉楊不從因辭去馮從子尤艷楊乾隆十六年七月甲申馮氏子誦楊獨處踰垣入楊方炊力拒馮氏子擲塊中楊楊仆遽死馮氏子懸其尸若自罄然扃戶走日勇訴縣窮治馮氏子伏法羅季兒妻秋蟬不知其氏武昌人爲攸人傭欲逼汗之不勝辱季兒秋蟬皆自殺

劉氏女小字惠舞陽人年十六美而端父母出力田女獨居治泉鄰子入其室女詬鄰子出復還掩其口女怒嚙鄰子傷手稍解女搏膺號鄰媼入視鄰子乃去哺父母還女言其事大慟謂爲無賴辱當死父母慰諭之百端卒自殺告官鄰子詭言故與女有私按女尸處子乃論殺鄰子

鍾某妻蔡嘉定人生農家年二十一而嫁嫁三月夫死力作日斷布三疋易粟

養姑姑憐之勸使更嫁蔡泣誓以死有女妹嫁無賴子欲得蔡語姑僞爲其弟娶者姑察蔡志堅弗許因搆蜚語讎蔡姑審其誣將率蔡懇諸縣無賴子陽使其妻歸謝而陰告母將結惡少夜劫之姑惶遽無所出縊焉蔡覺趨救得甦姑哽咽語曰吾女遇不淑重爲新婦累吾不忍見新婦之受其累也蔡曰母無慮婦留母不得安婦去母不得食雖然叔幼非母焉依請得卒哭焉以往乃奠夫慟入戶解絰自經死

段舉妻盧延津人盧有色一夕與其子女爲賊縊殺室中知縣詣視盧帛繫頸爪股血子女縊牀上知縣求賊村人集視一人手屈匿袖中令出手絮裏指端發視有齧迹視胸及股皆爪傷問之乃自言醜盧色夜穴牆入盧驚呼掩其口齧我指摔而過之屢仆屢起爪傷我身乃出腰間帛縊殺之子女號因並縊焉獄上盧得旌乾隆十八年事也

王某妻劉懷仁人歲大無豪族結奸僧貨沒饑人子女劉度不免從容語其夫曰姑老子幼不耐饑日暮俱死無益計不若鬻我誠得多金姑與子可無死汝

第送我于郊我得以身完夫忍而許之僧至遂囑婦夫送之行四日僧屏其夫夫未去劉語僧曰我夫不能庇我以至此戀戀何爲者是是非痛詈之弗肯去也僧以爲誠然縱飲且醉劉出呼其夫拔簪刺喉死僧皆驚散去

張良善妻王鞏縣雙槐村人事舅姑孝父爲傭母呼王還家故貧穴土爲室母出與幼弟二禮居有族子故無賴夜以刀割戶側土土落王驚問族子已入室王怒叱曰我而姑也而禽獸速出族子出刀曰刀何爲者任爾殺不懼族子刺王中左脅血溢自襦濺數步益怒詈復刺左右肋及乳王奪刀刃裂掌仆二禮亦呼族子斫其臂亦仆王復自地上躍起疾出戶呼殺人族子從之王創甚踰于石頭樹下族子割其口王口齧刀齒有聲族子抽刀破其頤王不能言聲猶厲身霍霍不已斷其喉乃死乾隆三十五年十月事也質明里見王死呼其父歸二禮言姊死狀衆聞王死烈弔者日千餘上于官誅族子

李青照妻張興國人鄉人赴官雲南青照將妻子以從鄉人艷張屢挑之張以語青照過長沙青照與妻子夜脫走青照復還取行囊張抱子以待長沙縣役

與相值詰得其情引以行稍遠乃逆青照脅以迷人詐得金並解所佩象齒蝦蟆去至張所示之詭言青照招使往張從登舟役迫之抱子入江死青照聞告官論役如律乃自經死

姚際春女浮梁人際春方遠行女待母居有母之族爲傭者佻而獷女惡之告母母謂彼于汝尊行也宜無他居稍久傭益恣女復告母不逐傭且殺兒母遣傭傭不行挾刃入女室女躍且呼傭刺其腹腸出母入視傭自剄女目未瞑移時甦猶語其母曰兒惜此身以報父母獨憾父出不一訣也語竟血飛濺承塵盡赤乃絕

王敦義妻張新陽人敦義早卒而家富其弟覬得之有無賴爲之計夜使年少僕匿張牀下而僞爲捕賊者僕自承與張私因呼里長縛僕並及張天初明僞爲縣役持牒逮張又僞爲居間者使張予金緩其事張歸心知爲叔竇有女字俞氏遂出案中裝爲一囊携女之俞氏以女託翁媼歸自經死

陳維章妻陸名趙鳳諸賢人父效忠初有黠者聞陸美欲娶之以齒非偶僞爲

其弟聘而陰爲弟別娶于李效忠聞絕黠者歸女于維章黠者易婚書賄媒妁以訟于縣縣判歸黠者黠者以與俟得判則刳持陸置輿中疾舁去陸方持祖姑服黠者迫更衣不可手裂其袞陸詣縣袖剪以往計不直則自殊倉卒被刳持行不得出及拒黠者裂袞觸手乃不敢迫使弟婦李守之李憐陸又自念處亂家時時與陸屏語或相持泣數日乃共縊繩不足續以帶時道光四年二月陸與李皆十七

何氏女山陰人居通州鄰有黠者聘爲其弄兒婦冀并亂之女截髮自誓鄰里以告官官判歸父母家別嫁女減食六閱月垂死告父母曰兒失身于匪人重見逼迫不幸告官又不幸判別嫁此子誠不肖兒則夫也兒欲爲之死又不敢傷父母意乃減食以求死初減十五逾二月減七又二月減九今不食已三日兒死非病願父母勿悲遂卒劉宏芳聘妻周霍州人未行而宏芳卒周亦減食數月乃死

謝亞煥妻王名杏芳東莞寶潭村人年二十一歸亞煥未期而寡從姑居有諸

生姦暴爲縣豪閹李美使告其姑欲爲從子娶姑辭焉則宣言將毀其居一日將數十人至大謀升屋撤橡發瓦姑走匿王出語衆曰若曹欲何爲我在也勿驚我姑豪呼衆篡之歸王故姦豪采毒草自備輿中食之盡至豪家登堂毒發死豪夜還其尸瘞于亞煥側姑與其母家懇縣獄成豪瘞死道光十一年事也張樹功妻吳常熟人樹功卒吳遺腹生男矢不嫁事姑撫孤子樹功有弟共居娒賢與吳相得死而再娶得悍婦奴婢視吳母子吳安之歲饑悍婦凌吳樹功弟川婦言欲嫁之吳痛哭告其子曰汝今九歲饑寒可自知我將舍汝從汝父去矣其子魯不知母將死也吳遂自經

郭某妻李仁和人早寡杭州初定防軍守諸門勢張甚車過男子下婦人必卷幔李從家人避兵郊外歸入錢塘門方小病門卒遙見之爲娒語李坐車中微聞之至家慟曰我不幸爲門卒語所辱我不可以生晨夕涕泣不食二十餘日卒

趙謙妻王威縣人當暑謙出王獨寢風入牖簾開若有窺者王忿不欲生舅姑

及謙曲喻之終不釋曰與其疑而生不若疑而死遂自經

郭氏女鳳陽人順治十一年女年十四樓居隣火女披衣下樓見救火者衆不欲前躍入火中死何氏女汜水人侍祖母同寢夜火其兄援祖母出復入救女女以衣履不具終不出與妹二表妹一同死沈鼎猷妻嚴浙江山陰人寡遇火倉卒不得衣救者至出其子門外復閉門焚死鐵山婦德化人火至傍舍鐵山塹高迫不得上或援以手婦不肯上及於火死

汪氏女與賀氏女皆歙人家縣之東門相隣也父母俱沒各居小樓中汪長賀一歲賀時從刺繡相親若姊妹縣大火初發汪未寢驚走出呼家人救賀往叩門賀自樓上問曰姊出乎曰已出故使來相迎少頃賀復曰吾求外襦不得不可以出幸謝姊既而火及汪氏之人欲排戶入救之賀怒詈乃不敢前竟焚死還報汪汪曰妹死吾何忍獨生趨賀死所躍入火亦死馮光琦女郭君甫妻吳皆盱眙人光琦恒爲客女母死屬吳爲侶遇火女扶母棺號火益烈救不至吳引女出女堅不肯起俱焚死

黃聲諸妻王婺源人寇至扶姑行避寇道失姑迹之至渡口水方盛行度橋橋欲圯有男子援以手卻之橋圯墮水據木浮中流男子以雨蓋授復卻之遂溺徐惟原妻許南陵人康熙間盜起許行當涉水從者請負以行許曰僕焉可負我寇大至入水死柯叔明妻鞏貴池人大水叔明及其子已出使僕負鞏鞏以僕裸不肯出死于水胡某妻裘新城人大水比戶皆乘屋鄰有裸而登者裘恥之不上溺死陳儒先妻李不知何許人夜半水至隣人呼升屋避李衣逐水去死不出白洋女不知何許人康熙四十七年大水從流至白洋有拯之者女以無衣不就拯死高氏婦六安人避水鄰樓惡男女雜處挈幼女下立曠地水大至其夫垂綆使援以上終不上竟死段吳考女稷山人雍正七年六月山水夜發壞廬舍女從水浮沈葦間鄰人赴援女以無衣不肯出入水死年十五曹氏女無爲人州有寺僧與婦人私鄰童入寺見之僧殺而埋焉童父訟于州僧辭服僧念罪當死不如多所連染得稽刑乃妄言良家子女與通者三十餘人女家故近寺亦在誣中州吏盡逮諸婦女白父當詣庭自列父不可且入城

謀諸吏忽女自至意色自如詣庭州吏出僧質僧曰汝非曹氏女耶女曰然僧曰吾所交惟汝最久且密女曰果爾吾身有異人處汝當知僧辭遁女固請入室使婦驗則下體有斑贅州吏始知僧言妄慰遣女歸女既歸歎曰吾所以蒙恥詣庭者非爲自表暴蓋欲全此三十餘人而救其死耳今事既白吾廢人也安用生爲且可使昏暴之吏有所愧懼也遂自經死

劉廷斌女四川溫江人廷斌道光七年官臺灣鎮總兵八年卒官喪還渡海遇盜盜殺其家十七人盡女以美獨不殺有客附舟哀盜擲岸上盜以女還居十餘年生四子一日女入寺禮佛見僧似若相識既歸省僧即附舟客也乃爲牒具遇盜始末復入寺密以畀僧僧告官官取盜及其徒悉誅之繫四子以問女女曰我所以受汙不即死者仇未報耳仇報矣此曹豈我子哉手刃四子自殺死

張氏女山東人貧爲婢其主明魯王近屬也明亡張挈朱氏子流離旁郡行傭不給得巨室子朱氏子稍長爲諸生聖祖即位詔先朝諸宗人得以本姓歸田

廬張乃爲朱氏子泣言其故朱氏子復姓召諸長老願爲張加冠事之如母張
絕曰吾朱氏不成妾也今主君主婦何在吾何敢輒位吾以姐始亦以姐終願
勿復言俗謂婢曰姐故張言如是崇德五年師伐明下河間河間知府曲阜顏
庶明自焚有孫嫗者傭于顏挾其幼孫光敏從師出關問道徒步還曲阜歸顏
氏孫與張同以義行稱

陳氏婢金蓮梁縣人縣諸生陳其珍家婢也流賊被縣金蓮負其珍幼子以逃
賊追及令棄陳氏子與俱去金蓮不可賊斫陳氏子金蓮身覆翼之被數創終
不捨賊去金蓮死陳氏子得全邱氏婢新喜瀘江人邱氏富寇至舉室走匿執
新喜問其主安在榜之垂斃終不言寇退創重死邱氏世祠焉

董氏江都人傭于韓氏順治二年師下揚州韓氏夫婦及其長子皆死難主婦
蕭將死以其幼子魏託于董方三歲即夕董懷幼子匍匐亂軍中出自寶匿江
濱拾麥穗啖之得不死亂定魏育于故人家將婚迎董董疾甚與以來語新婦
曰嫗病且死不復見爾夫婦爾夫昔抱持從萬死中活有今日其人賢雖貧勿

憂後且大母效世俗兒女子易爾夫也

任氏西充人夫曰楊汝學備縣中李可還家爲其子愍乳母流寇亂四川可還且死以愍屬任俄而寇萬騎猝至任負愍走問道得脫歲大饑從汝學流轉陝西嘗棄兄弟之子而全龐氏子四川定任曰龐故儒也子今且九歲弗使就學吾何以對龐君携以歸使就學夫婦力耕以給愍中康熙二年舉人任曰吾乃今無媿于龐君尋卒同時又有袁氏明侍郎李兆家婢李氏兆子映庚乳母也流寇亂兆兄完謀舉義兵不克其族燬焉袁以計脫映庚李行求映庚得之僧寺藏其家複壁范士龍者兆僕也自兆所至因送映庚還兆士龍歸西充歲饑妻子五人皆餓死蓋亦義者云

盧尚義妻梁文安人織席以養姑得遺金告于姑求主者還之主者餽以布告于姑堅辭不受世宗時命御史鄂昌等巡察直隸以其事聞特敕嘉獎賜米十石布十疋並命有司扁其門以旌良淑

白氏秦安人爲張翠侍女翠妻先卒而病且死目其子女泣白曰君逝矣此呱

呱者婢責也翠頷之而泣不止白挽髻拜牀下曰婢今爲君婦豈以死生異其志也翠乃瞑白撫其子女至老

王氏名秋波爲晉江蔡氏婢主將以爲妾而卒無子秋波長家人遣之秋波泣曰郎君將以爲妾郎君死不可以貳有爲郎君後者婢請得撫之不然當殉族人義焉以從子六韜爲其主後娶于吳生子而六韜又卒秋波與吳同處撫孤秦士楚妻洪皆江人早寡事姑撫子不憚艱苦父家覆於仇中危法當收孥姪走匿秦氏收者至秦氏之人皆走避洪獨不走收者詰之對曰無也所以刃被數創終不言洪氏孤匿處

張氏婢海甯人主母寡而貧其兄割屋與其婢居紡績以食婢事主母謹主母病將殆無收卹之者婢度事亟招媒氏願自鬻以其值治喪曰無多求得七十緡以爲主母歛事畢吾來爲之婦以告主母主母感其義主母死婢以七十緡爲之歛事畢要夫家以輿迎婢撫棺痛幾絕旣蘇再拜乘輿去

楊氏婢不知何許人亦不詳其氏與名主江西清江楊氏楊氏之妾寡將嫁前

一夕呼婢不應怒曰汝我婢也何敢爾婢曰我楊氏婢耳汝今誰家婦者曰我婢我婢妾方持剪墜起環走至曙呼其婢曰我復爲爾主汝當何如婢叩頭泣妾亦泣遂謝媒妁不行後將嫁其婢婢曰人以我一言故忍死至今我亦終不去楊氏門

江貴壽妻王名保姑歎人貴壽樵也年倍王王事之無怨語既嫠入縣曹氏爲其女保母曹氏女嫁從之往咸豐十一年出避賊曹氏女方娠不能行乃匿諸深草中而立以護之賊至創喉猶求糠麩和水食曹氏女凍餒數日死曹氏女卒得免

張祿妻徐深州人同治七年張總愚之徒破州賊掠二女至其家叱祿使飼馬而令徐監二女炊徐詰二女皆世族炊竟賊皆據案食徐導二女潛出巷指歸路二女請徐偕徐曰我去賊且殺我夫歸就祿謀偕走賊見問二女徐忿罵賊賊殺之

任氏婢祥不知何許人亦不知其氏任氏子僕也故家京師東郭門外徙保定

屬其母于祥曰余將之廣平余妻不足恃而善事余母祥與其母居三年母病促任氏子歸歸則母已死任氏子慟絕而甦夜半猶哽咽翌晨視之則亦死既歛其妻將挾幼女嫁祥爭之乃留女女方四歲乞食以爲養鄰里義焉共周之持二棺還葬祥終不嫁又有通州鄭氏女婢于馬氏馬氏中落他奴僕皆去而鄭獨留侍疾育幼主以浣衣得直贍其主歷七十餘年終不去以處子終

王氏婢不知其氏石屏人王氏夫婦皆死其子元勳生七月婢已嫁生子乃撫而乳之稍長賣養仝供餽粥令入塾使其子事之甚謹元勳卒舉於鄉徐氏女平湖人爲曹氏婢名曰春梅其主死遺子女各一春梅年二十餘不嫁撫其子女其子女有過涕泣勸導勤苦畢婚嫁其主有兄迫欲嫁之終不行

丁香不知其氏雲南南甯人爲程氏婢程氏女嫁于吳丁香從吳中落程氏女以女紅自給丁香執役不稍怠程氏女謂曰有富家以數十金聘汝我受金汝亦得所蓋行乎丁香跪誓死相從程氏女知其意堅乃不復言後益貧丁香出爲傭得資以養數十年卒不嫁江金姑金谿人爲朱氏婢朱氏女歸江勝焉江

夫婦皆卒金姑矢不嫁育其孤娶婦未有子其孤父天金姑告于江氏之族爲立後佐婦撫所後子至成立

羅氏荔浦獐婦也夫死不更嫁獐俗善歌或以歌誘婦必正色不爲動以節顯于獐

隴聯嵩妻祿鎮雄人也鎮雄故土司聯嵩世領其地爲土知府卒子慶侯嗣雍正五年坐事奪職收其地設流官所部欲爲變祿諭之曰我家以忠著今日宜安義命毋妄動所部乃解八年烏蒙土民叛祿親至舊所部各寨申諭利害至欲自殺所部僉警服祿躬率衆衛官解佐軍食城恃以全總督鄂爾泰建坊表其忠請于朝封安人予田二十畝使供隴氏祀

者架聘妻直額貴州大定种民既許嫁者架貧不能娶直額父母欲女別嫁不可強之自殺羅廷勝妻馬名阿透寧各司羊海寨种民女也廷勝死阿透年二十六父欲爲別嫁阿透哭于廷勝墓自經死羅朝彥妻劉名阿全朝彥种民劉璽安人朝彥死其弟欲妻嫂引強暴迫劉自殺

安于磐妻朱後妻田于磐貴州蠻夷司長官初娶朱事姑孝姑病刲股卒復娶田于磐病刲股于磐卒撫諸子成立田養民妻楊養民朗溪司長官楊邑梅司人也年十二母病刲股

李任妻矣魯戩人夷羅厄女也羅厄爲李氏側李氏欲汗之不從縛置積薪上曰不從將焚矣大罵遂焚死事聞罪李氏

鄂對妻熱依木鄂對庫車回頭人與其曾霍集占有隙霍集占以葉爾羌叛鄂對與其子鄂斯滿棄家走迎師于伊犁霍集占破庫車憾鄂對不附執熱依木欲納之不可殺其子女三而囚之熱依木脫走師克霍集占授鄂對貝勒葉爾羌阿奇木伯克鄂斯滿二等台吉庫車阿奇木伯克居數年烏什回叛熱依木在庫車請于辦事大臣曰回性喜效尤今烏什叛葉爾羌戶衆伯克阿渾輩不知順逆鄂對懦無斷請得往助之熱依木行五日至葉爾羌伯克阿渾輩入見言烏什熱依木漫應之期明日會飲明日衆集熱依木曰汝等皆無籍蒙大皇帝恩爲太平民今烏什叛即日夷滅乃欲效尤爲不忘不義鬼耶吾力尙能殺

爾曹爾曹今日毋思出此門衆愕顧門守甚嚴皆跪白無反狀熱依木乃具筵
曉以利害衆皆泣則出歐姬勸飲盡醉陰使人徧收諸家戰具驅其馬令遠牧
鄂對日率諸伯克集辦事大臣庭夜分散衆大定及烏什破多所誅戮葉爾羌
獨全

瓦寺土司索諾木榮宗母麥麥吉早寡撫索諾木榮宗成立綏輯番落有功於
邊被詔旌表明正土司堅參達結妻喇章無子次妻天天生二子堅參達結死
喇章天天同護土司印撫二子成立乾隆間從征金川有功亦被詔旌表

沙氏女會理州人父爲土千戶所屬土百戶自氏富妻以女嫁弟送之往將入
自氏所轄境女語其弟曰自氏奴也汝主也我受父命不敢違汝不當入涕泣
而別女至自氏自氏子求合女堅拒之不食七日死

嘉義番婦加溜灣社番大治妻也大治死願變故俗不更嫁引刀誓曰婦髮可
封婦臂可斷婦節不可移力耕育其子居三十七年乃卒施世燿妻苗世燿韻
溪人苗偶辰港夷女世燿死苗自經殉焉

清史稿

土司傳一

西南諸省水複山重草木蒙昧雲霧晦冥人生其間叢叢蟲蟲言語飲食迥殊華風曰苗曰蠻史冊屢紀顧略有區別無君長不相統屬之謂苗各長其部割據一方之謂蠻若粵之獞之黎黔楚之猺四川之裸羅之生番雲南之野人皆苗之類若漢書南夷君長以十數夜郎最大其西靡莫之屬以十數滇最大自滇以北君長以十數邛都最大在宋爲羈縻州在元爲宣慰宣撫招討安撫長官等土司湖廣之田彭四川之謝向冉廣西之岑韋貴州之安楊雲南之刀思遠者自漢唐近亦自宋元各君其君各子其子根柢深固族姻互結假我爵祿寵之名號乃易爲統攝故奔走惟命皆蠻之類明代播州蘭州水西麓川皆勤大軍數十萬彈天下力而後剷平之故雲貴川廣恆視土司爲治亂清初因明制屬平西定南諸藩鎮撫之康熙三年吳三桂督雲貴兵兩路討水西宣慰安坤之叛平其地設黔西平遠大定威甯四府三藩之亂重昭土司兵爲助及叛

藩戡定餘威震于殊俗至雍正初而有改土歸流之議四年春以鄂爾泰巡撫雲南兼總督事奏言雲貴大患無如苗蠻欲安民必先制夷欲制夷必改土歸流而苗疆多與鄰省犬牙相錯又必歸并事權始可一勞永逸即如東川烏蒙鎮雄皆四川土府東川與滇一嶺之隔至滇省城四百餘里而距四川成都千有八百里去冬烏蒙土府攻掠東川滇兵擊退而川省令箭方至烏蒙至滇省城亦僅六百餘里自康熙五十三年土官祿鼎乾不法欽差督撫會審畢節以流官交質始出益無忌憚其錢糧不過三百餘兩而取於下者百倍一年四小派三年一大派小派計錢大派計兩土司一取子婦則土民三載不敢昏土民有罪被殺其親族尙出墊刀數十金終身無見天日之期東川已改流三十載仍爲土目盤踞文武長庠省城膏腴四百里無人敢壑若東川烏蒙鎮雄改隸雲南俾臣得相機改流可設三府一鎮永靖邊氛此事連四川者也廣西土府州縣峒寨等司五十餘員分隸南甯太平思恩慶遠四府多狄青征儂智高王守仁征田州時所留設其邊患除泗城土府外餘皆土目橫于土司且黔粵向

以牂牁江爲界而粵之西隆州與黔之普安州逾江互相斗入苗寨峯閣文武動輒推諉應以江北歸黔江南歸粵增州設營形格勢禁此事連廣西者也滇邊西南界以瀾滄江江外爲車里緬甸老撾諸土司其江內之滇沅威遠元江新平普洱茶山諸夷巢穴深邃出沒魯魁哀牢間無事近患腹心有事遠通外國自元迄明代爲邊害論者謂江外宜土不宜流江內宜流不宜土此雲南宜治之邊夷也貴州土司向無鉗束羣苗之責苗患甚于土司而苗剽四周幾三千餘里千有三百餘寨古州距其中羣峯環其外左有清江可北達楚右有都江可南通粵皆爲頑苗蟠據梗隔三省遂成化外如欲開江路以通黔粵非勦兵深入徧加勦撫不可此貴州宜治之邊夷也臣思前明流土之分原因煙瘴新疆未習風土故因地制宜使之鄉導彈壓今歷數百載相沿以夷治夷遂至以盜治盜苗裸無追賊抵命之憂土司無革職削地之罰直至事大上聞行賄詳結上司亦不深求以爲鎮靜邊民無所控訴若不剷蔓塞源縱兵刑財賦事專整飭皆治標而非治本其改流之法計禽爲上兵勦次之令其自首爲上勒

獻次之惟制夷必先練兵練兵必先選將誠能賞罰嚴明將士用命先治內後攘外必能所向奏效實雲貴邊防百世之利世宗知鄂爾泰才必能辦寇即詔以東川烏蒙鎮雄三土府改隸雲南六年復鑄三省總督印令鄂爾泰兼制廣西於是自四年至九年蠻悉改流苗亦歸化間有叛逆旋即平定其間如雍正朝古州苗疆之盪平乾隆朝四川大小金川之誅鋤光緒朝西藏噶對之征伐皆事之鉅者分見於篇其土官銜號曰宣慰司曰宣撫司曰招討司曰安撫司曰長官司以勞績之多寡分尊卑之等差而府州縣之名亦往往有之今土司之未改流者四川宣撫使二曰印部曰沙馬宣慰司五曰木坪曰明正曰巴底曰巴旺曰德爾格忒安撫使二十有一曰長甯曰沃日曰瓦寺曰校磨曰瓜別曰木裏曰草什札曰巴底曰綽斯甲布曰喇亥曰瓦述餘科曰霍耳竹窩曰霍耳章谷曰霍耳孔撒曰霍耳咱曰林葱曰霍耳甘孜麻書曰霍耳東科曰春科曰下瞻對曰上納奪長官司二十有九曰靜州曰隴木曰岳希曰松岡曰卓克基曰威龍州曰陽地隘口曰黨壩曰河東曰阿都正曰普濟州曰昌州曰沈邊

曰冷邊曰瓦述咽囉曰瓦述毛了曰瓦述曲登曰瓦述色他曰瓦述更平曰雀耳納林沖曰雀耳白利曰春科高曰曰上瞻對曰蒙葛結曰泥溪曰平夷曰蠻夷曰沐川曰九姓雲南宣慰使一曰車里宣撫使五曰耿馬曰隴川曰干崖曰南甸曰孟連副宣撫使二曰遮放曰蓋達安撫使三曰路江曰芒市曰猛卯副長官司三曰納樓曰虧容甸曰十二關土府四曰蒙化曰景東曰孟定曰永甯土州四曰富州曰灣甸曰鎮康曰北勝貴州長官司六十有二曰中曹曰白納曰養龍曰虎墜曰程番曰上馬曰小程曰盧番曰方番曰違番曰羅番曰臥龍曰小龍曰大龍曰金石曰大平曰小平曰大谷龍曰小谷龍曰木瓜曰麻撈曰新添曰平伐曰羊場曰募役曰頂營曰沙營曰楊義曰都勻曰邦水曰思南曰豐甯上曰豐甯下曰爛土曰平定曰樂平曰卯水曰偏橋曰蠻夷曰沿河曰郎溪曰都坪曰黃道曰都素曰施溪曰潭溪曰新化曰歐陽曰亮寨曰湖耳曰中林曰八舟曰龍里曰古州曰洪州曰省溪曰提溪曰烏羅曰平頭曰垂西曰抵寨曰岩門副長官司三曰西堡曰康莊曰石門廣西土州二十有六曰忠州曰

歸德曰果化曰下雷曰下石西曰思陵曰憑祥曰江州曰思州曰萬承曰太平
曰安平曰龍英曰都結曰結安曰上下凍曰佶倫曰茗州曰茗盈曰鎮遠曰那
地曰南舟曰田州曰向武曰都康曰上映土縣四曰羅陽曰上林曰羅白曰忻
城長官司三曰遷隆峒曰永定曰永順凡宣慰宣撫安撫長官等司之承襲隸
兵部土府土州之承襲隸吏部凡土司貢賦或比年一貢或三年一貢各因其
土產穀米牛馬皮布皆折以銀而會計於戶部 雍正七年川陝總督岳鍾琪
奏四川巴塘裏塘等處請授宣撫司三員安撫司九員長官司十二員給與印
結號紙副土官四員千戶三員百戶二十四員給以職銜以分職守內巴塘裏
塘正副土官原無世代頭目承襲請照流官例如有事故開缺題補與他土司
不同

湖廣

湖廣之西南隅戰國時巫郡黔中地湖北之施南容美湖南之永順保靖桑植
境地毘連介於岳辰常德宜昌之間與川東巴夔相接壤南通黔西通蜀元時

所置宣慰安撫長官司之屬明時因之向推永保諸宣慰世席富強兵亦果敢每遇征伐荷戈前驅國家倚之爲重清有天下僅施南散毛容美三宣撫使永順保靖兩宣慰使而已雍正年間施南容美永順保靖先後納土特設施南一府隸北布政使永順一府隸南布政使兩府既設合境無土司名目後有苗寇分見各傳不入此篇

施南古巴地秦漢南郡蠻唐施州元置施南宣撫司忠孝安撫司明玉珍時復置忠路宣撫司明宣德三年復置劍南長官司立施州衛領所一宣撫司四安撫司九長官司十三蠻夷官司五清康熙三年施州始歸順四年改沙溪宣慰司爲宣撫司改劍南長官司爲建南長官司而施南宣撫司忠孝安撫司忠路安撫司如故雍正六年從湖廣總督邁柱之請裁施州衛設恩施縣改歸州直隸州原管之十五土司并隸恩施縣十二年忠孝安撫司田璋納土其地入於恩施縣十三年施南宣撫司覃禹鼎以罪改流於是忠峒土司田光祖等并請歸流乃以十五土司并原設恩施縣特設施南府領六縣容美改鶴峯州別隸

宜昌府領於巡荆道

明制施州衛轄三里五所三十一土司市郭里都亭里崇甯里附郭左右中三所大田軍民千戶所支羅鎮守百戶所 大田所元爲散毛峒明洪武五年定其地二十三年屬千戶所仍名散毛尋改爲大田軍民千戶所領百戶所一土官百戶所十刺惹等三峒 支羅所舊隸龍潭司明嘉靖四十四年因峒長黃中叛討平之遂割半置所立屯以百戶二員世鎮之而今峒司屬焉 施南宣撫司元施南道宣慰使明洪武四年覃大富入朝七年升宣撫司清因之雍正時覃禹鼎襲禹鼎容美土司田明如塔也有罪輒匿容美當事以明如之先從征紅苗有功置勿問十三年明如被逮自經死禹鼎以淫惡抗提擬罪改流以其地置利川縣 東鄉安撫司明玉珍置東鄉五路宣撫司明洪武六年改安撫司命覃起喇爲之清初歸附雍正十年覃壽椿以長子得罪正法改流以其地入恩施縣 忠建宣撫司明洪武四年以田恩俊爲之六年改宣撫司清初歸附雍正十一年田興爵以橫暴不法擬流以其地爲恩施縣 金峒安撫司

明洪武四年以覃耳毛爲之清初歸附康熙四十三年覃世英襲子邦舜呈請改流以其地爲咸豐縣 忠峒安撫司元置湖南鎮邊宣慰司明洪武四年命田璽玉爲宣撫司永樂四年改安撫司清初田楚珍歸附調征播州有功仍准襲職雍正十二年田光祖糾十五土司呈請納土歸流以其地入宣恩縣 散毛宣撫司元爲散毛府至正六年改宣撫司明洪武四年命覃野旺爲宣撫司割其半爲大田所清初覃勳麟歸附仍准襲職雍正十三年覃烜納土以其地入來鳳縣 忠路安撫司明洪武四年命覃英爲安撫司清康熙元年覃承國歸附以征譚逆功襲前職雍正十三年覃楚梓納土以其地改利川縣 忠孝安撫司元至正十一年改軍民府明洪武四年以田墨施爲安撫司清因之康熙八年田京襲累授總兵十九年告休雍正十三年田璋納土以其地爲恩施縣 高羅安撫司元高羅寨長官司明洪武六年改安撫司以田大名爲之清順治初田飛龍歸附仍准世襲雍正十三年田昭納土以其地入宣恩縣 木册長官司元置安撫司明永樂六年改長官司以田谷佐爲長官司清初田經

國歸附仍與世襲雍正十三年田應鼎納土以其地入宣恩縣 大旺安撫司
元至正置明洪武四年以田驢蹄爲安撫司清康熙初田永封歸附仍准襲職
雍正十三年田正元納土以其地入來鳳縣 臨壁長官司原附大旺清康熙
元年頒給田琦印信仍與世襲雍正十三年田封疆納土以其地入來鳳縣
東流安撫司原附大旺 唐崖長官司元置千戶所明洪武七年改長官司清
初覃宗禹歸附仍與世襲雍正十三年覃梓桂納土以其地入咸豐縣 龍潭
安撫司明洪武四年以田應虎爲安撫司清初歸附仍准世襲雍正十三年田
貴龍納土以其地入咸豐縣 沙溪安撫司明置清初歸附康熙四年黃天奇
襲安撫司天奇子楚昌初楚昌入施州衛學爲諸生時諸司爭併民鮮知禮楚
昌折節力學有時名及襲職設官學公餘與多士講肄多所成就楚昌死子正
爵襲雍正十三年改流其地入於利川縣 卯峒長官司清雍正十三年長官
司向舜納土以其地入來鳳縣 漫水宣撫司清初宣撫司向國泰歸附仍准
世襲雍正十三年向庭官納土其地入於來鳳縣 西萍長官司雍正十三年

裁其地入於咸豐縣 建南長官司明宣德五年置清雍正十三年裁其地入於利川縣 容美土司唐元和元年田行皋從高崇文討平劉闢授施添溶萬招討把截使仍知四州事宋有田思政元有田乾亨明洪武三年田光寶以元所授諸敕詣行在請換乃命光寶仍爲宣慰使傳至田既霖清順治間歸附仍授宣慰使子甘霖襲甘霖字特雲著合浦集甘霖子舜年字九峰受吳逆僞承恩伯敕後繳奉檄從征有勞績頗招名流習文史刻有廿一史纂目自課某日讀某經閱某史至某處刻於書之空處用小印志之有白鹿堂集容陽世述錄子明如襲職以放肆爲趙申喬劾奏奉旨原宥雍正十一年再爲適柱嚴參明如移駐平山寨擬抗拒爲石梁長官司張彤珪催迫明如自盡改土歸流改司爲鶴峰州隸宜昌府

永順漢武陵隋長州唐溪州地宋時爲永順州元時彭萬潛自改爲永順等處軍民安撫司明洪武五年改宣慰使清順治四年恭順王孔有德至辰州宣慰使彭宏澎率三知州六長官三百八十峒苗蠻歸附十四年頒給宣慰使印並

設流官經歷一員康熙十年吳三桂叛踞辰龍關授永順宣慰使彭廷椿僞印
廷椿繳之奉旨賞其子宏海總兵銜令率土兵協勦有功授宣慰司印雍正六
年宣慰使彭肇槐納土請歸江西祖籍有旨嘉獎授參將並世襲拖沙喇哈之
職賜銀一萬兩聽其在江西祖籍立產安插改永順司爲府附郭爲永順縣分
永順白崖峒地爲龍山縣 南渭州土知州屬永順司元至元中置安撫司明
洪武二年以彭萬金爲土知州傳至彭應麟清順治四年歸附雍正五年彭宗
國納土以其地入永順縣 施溶州土知州在永順司東南元會溪施溶等處
長官司明洪武二年改州以田建霸爲土知州傳至田茂年清順治四年歸附
雍正五年田永豐納土 上溪州土知州屬永順司明洪武二年以張義保爲
土知州傳至張漢卿清順治四年歸附雍正五年張漢儒納土 臘惹峒長官
司元屬思州以向孛爍爲總管明洪武五年改屬永順司以田世貴爲長官司
傳至田仕朝清順治四年歸附雍正五年田中和納土 麥著黃峒長官司元
曰麥著土邨屬思州明洪武五年改屬永順司以黃谷踵爲長官司傳至黃甲

清順治四年歸附雍正五年黃正乾納土 驢遲峒長官司元屬思州明洪武
五年改屬永順司以向迪踵爲長官司傳至向光胃清順治四年歸附雍正五
年向錫爵納土 施溶溪長官司元屬思州明初改屬永順司以汪良爲長官
司傳至汪世忠清順治四年歸附雍正五年汪文珂納土 白巖峒長官司元
屬葛蠻安撫司明初改屬永順司以張那律爲長官司傳至張四教清順治四
年歸附雍正五年張宗略納土 田家峒長官司明洪武三年以田勝祖爲長
官司傳至田興祿清順治四年歸附雍正五年田盡臣納土 保靖宣慰司亦
唐溪州地宋曰保靜州元爲保靖州安撫司明仍爲安撫使清順治四年明宣
慰司彭象乾之子彭朝柱歸附象乾曾孫澤虹病廢其妻彭氏用事漢奸高倫
張爲任二人結連其舍把長官彭澤蛟彭祖裕等相與樹黨以劫殺爲事雍正
元年澤虹死子御彬幼澤蛟欲奪其職爲御彬所遏迨御彬襲職肆爲淫凶澤
蛟與其弟澤虬合謀互相劫殺二年御彬以追緝澤蛟爲名潛結容美土司田
旻如桑植土司向國棟率土兵搶虜保靖民財七年御彬安置遼陽以其地爲

保靖縣 大喇司在龍山縣屬保靖司明正德十五年以上舍彭惠協理巡檢事傳至彭御佑雍正十三年納土 桑植宣慰司本慈利縣地元有上桑植下桑植宣慰司明置安撫司清順治四年宣慰司向鼎歸附授原職鼎子長庚調鎮古州入萬長庚子向國棟殘虐與容美永順茅岡各土司相仇殺民不堪命雍正四年土經歷唐宗聖與國棟弟國柄等相率赴愬總督傅敏入奏乃繳追印篆國棟安置河南以其地爲桑植縣 上下峒長官司明置宣撫司復改爲長官司而分其地爲二清康熙二年向九鸞向日葵歸附二十一年給九鸞上峒長官司印日葵下峒長官司印雍正十三年上峒司向玉衡下峒司向良佐納土以其地屬桑植縣 茅岡長官司明改天平千戶所清順治四年石門天平所千戶覃祚昌茅岡長官覃蔭祚等相繼歸附給與印信雍正十二年茅岡土司覃純一納土石門天平所慈利麻寮所相繼請設流官分其地屬石門慈利安福三縣

清史稿

土司傳二

四川

四川邊境寥廓歷代多設土司以相控制明末張獻忠屠蜀石砭酉陽松潘建昌等土司距險禦賊其地獨全清初戡定川境各土司次第効順川之南有金川者本明金川寺演化禪師哈伊拉木之後分爲大小金川順治七年小金川卜兒吉細歸誠授原職吳三桂亂後康熙五年其曾嘉納巴復來歸給演化禪師印其庶孫莎羅奔以土舍將兵從將軍岳鍾琪征西藏羊峒番雍正元年奏授安撫司居大金川而舊土司澤旺居小金川莎羅奔以女阿扣妻澤旺澤旺懼爲妻所制乾隆十一年莎羅奔劫澤旺去奪其印十二年又改革布什札及明正兩土司朝廷調張廣泗總督四川進駐澤旺所居美諾官寨而以甘弟良爾吉從征時莎羅奔居勒烏圍其兄子郎卡居噶爾哇地在大金川河東而河西亦有地數百里廣泗調兵三萬一路出川西攻河東一路出川南攻河西而

河東一路又分爲四以兩路攻勒烏圍以兩路攻噶爾匪河西亦分兩路攻庚特額諸山刻期賊事阻險不前上命大學士公訥親往視師起岳鍾琪於廢籍鍾琪與廣泗議定自任由黨壩取勒烏圍而廣泗由昔嶺取噶爾匪會訥親至下令限三日克噶爾匪總兵任舉參將賈國良戰死廣泗輕訥親不知兵而惡其凌已故飾推讓實以困之軍中解體良爾吉夙與阿扣通莎羅奔因使成配倚作間諜官軍動息輒爲所備師久無功上怒甚會訥親劾廣泗於是逮廣泗入京而命大學士傅恒爲經略代訥親冬殺廣泗賜訥親死十二月傅恒至軍斬良爾吉王秋阿扣以斷內應十四年春正月奏言金川之事臣到軍以來始知本末當紀山進討之始惟馬良柱轉戰直前踰沃日收小金川直抵丹噶其鋒甚銳其時張廣泗若速濟師策應乘賊守備未周殄滅尙易乃坐失機會宋宗璋逗留於雜谷許應虎失機於的郊致賊得盡據險要增礮備禦七路十路之兵無一路得進及訥親至軍嚴切催戰任舉敗歿銳挫氣索晏起偷安一以軍務委張廣泗廣泗又聽奸人所愚惟恃以卡逼卡以礮逼礮之法槍礮惟及

堅壁於賊無傷而賊不過數人從暗擊明槍不虛發是我惟攻石而賊實攻人且於礮外開濠兵不能越而賊得伏其中自下擊上又戰礮銳立高於中土之塔建造甚巧數日可成隨缺隨補頃刻立就且人心堅固至死不移礮盡碎而不去礮方過而人起主客勞佚形勢迥殊攻一礮難於克一城即臣所駐卡撒山頂已有三百餘礮計半月旬日得一礮非數年不能盡且得一礮輒傷數十百人較唐人之攻石峰堡尤爲得不償失惟有使賊失其所恃而我兵乃得展其所長臣擬喚大兵齊集別選銳師旁探間道裹糧直入踰礮勿攻繞出其後即以圍礮之兵作爲護餉之兵番衆無多外備旣密內守必虛我兵即從捷徑搗入則守礮之番各懷內顧人無固志均可不攻自潰至於奮勇固仗滿兵而鄉導必用土兵土兵中小金川尤驍勇今良爾吉之奸謀已誅澤旺與賊讎甚切驅策用之自可得力至沃日瓦寺兵強而少雜綽斯甲等兵衆而懦弱正木坪忠順有餘強悍不足革什乍兵銳可當一路是各土司環攻分地之說雖不可恃而未嘗不可資其兵力臣決計深入不與爭礮惟喚四面布置出其不意

直搗巢穴取其渠魁定於四月間報捷上屢奉皇太后息武甯邊之諭命傅恒班師時傅恒及鍾琪兩路連克礪卡軍聲大振莎羅奔乞降於鍾琪鍾琪輕騎徑赴其巢賊大感動頂佛經立誓聽約束次日鍾琪率莎羅奔父子坐皮船出洞詣大軍莎羅奔等叩額誓遵六事歸各土司侵地獻凶酋納軍械歸兵民供徭役乃宣詔赦其死諸番焚香作樂獻金佛謝二月捷聞詔賞傅恒鍾琪等既而莎羅奔兄子郎卡主土司事漸桀驁二十三年逐澤旺及革布什札土司三十一年詔四川總督阿爾泰檄九土司環攻之九土司者巴旺丹壩沃日瓦寺綽斯甲明正木坪革什乍及小金川也巴旺丹壩皆彈丸非金川敵明正瓦寺形勢阻隔其力足制金川而地相逼者莫如綽斯甲與小金川阿爾泰不知離其黨與反聽兩金川釋仇締約自是狼狽爲奸諸小土司咸不敢抗時澤旺老病不問事郎卡亦旋死其子索木諾與僧格桑侵鄂克什土司地三十六年索諾木誘殺革布什札土官而僧格桑再攻鄂克什及明正土司與官軍戰上以前此出師本以救小金川今小金川反悖逆罪不赦賜阿爾泰死命大學士溫

福自雲南赴四川以尙書桂林爲四川總督共討賊溫福由汶川出西路桂林由打箭鎚出南路僧格桑求援於索諾木索諾木潛兵助之三十七年春桂林克復革布什札土司故地溫福克賽里及阿喀朝廷以阿桂爲參贊大臣代桂林赴南路十一月阿桂以皮船背濟連奪險隘直搗賊巢十二月軍抵美諾進至底木達俘澤旺檄索諾木縛獻僧格桑不應上命溫福爲定邊將軍阿桂豐仲額爲副將軍溫福阿桂奏六路進兵之策溫福由功噶入阿桂由當噶入豐仲額由綽斯甲入三十八年春溫福以賊扼險不得進別取道攻昔嶺駐營木果木令提督董天弼分屯底木達守小金川之地溫福爲人剛愎不廣諮方略惟襲廣洩故智以礮卡逼礮卡建築千計初索諾木欲併小金川地故留僧格桑挾以號召六月陰遣小金川頭目等由美諾溝出煽故降番使復叛諸番見大軍久頓蠡起應之攻陷天弼營遂劫糧臺潛兵襲木果木奪礮局斷汲道賊四面蹂入大營溫福死之將士隨員死者數十人各卡兵望風潰海蘭察聞警赴援殿衆由間道退出收集潰卒尙萬數千人其戰歿者三千餘小金川地復

陷惟阿桂一軍屹然不動乃整隊出屯翁古爾壘上在熱河聞報召大學士劉
統勳詣行在咨之統勳前言金川不必勞師至是亦主用兵乃授阿桂定西將
軍豐伸額明亮爲副將軍十月阿桂改赴西路明亮赴南路豐伸額仍由綽斯
甲進取宜喜阿桂入自額克什轉戰五晝夜直抵美諾克之明亮入自瑪爾里
所向皆捷遂盡復小金川地惟大金川自十二三年以來全力抗守增壘設險
嚴密十倍小金川七月令諸軍分攻各礮寨數十道並進海蘭察率死士六百
削壁梯引而上趾頂相接比明及其礮一湧入盡殲守賊數十里賊寨聞之皆
奪氣悉破之乘勝臨遜克宗壘索諾木酖殺僧格桑而獻其尸及其妻妾頭目
至軍乞赦已罪阿桂檻送京師四十年四月阿桂先使福康安海蘭察赴河西
助明亮攻宜喜遂分兵六路盡滅河西二十里內之賊五月阿桂河東之軍破
朗噶寨距勒烏圍僅數里環營進逼其巢七月抵勒烏圍八月十五夜進搗賊
巢四面礮轟官寨破之黎明克轉經樓逸賊皆溺水死莎羅奔兄弟及各頭目
已先期遁往噶爾厓十一月官軍攻克科布曲山十二月遂據瑪爾古山噶爾

厓即在其下索諾木之母姑姊妹亦降官軍三路合圍噶爾厓斷其水道索諾木使其兄詣營乞哀不允圍攻益急索諾木從莎羅奔及其妻子挈番衆二千餘出塞奉印獻軍門降金川平四十一年正月獻俘廟社封賞阿桂等勒碑太學並及兩金川旋於大金川設阿爾古廳小金川設美諾廳四十四年併阿爾古入美諾改爲懋功廳同治二年粵匪石達開竄寧遠假道邛部土司土司先受官軍約束引賊至紫打地四面阻絕達開糧罄路窮射書千戶王承元賈路復使人說土司嶺承恩求緩兵皆不應日殺馬煮桑葉爲食四月承恩承元等偵賊力竭率夷衆蹙攻禽達開並賊官五人付官軍檻送成都四川總督駱秉章誅之奏加承恩承元二品銜賊軍鎬重悉爲兩土司所得初瞻對土司恃強不法雍正八年四川提督黃廷桂勦降之乾隆十年四川提督李質粹等率兵五千取道東俄落至裏塘進兵連破番寨獲賊首噶籠丹坪十一年質粹會欽差大臣班第統兵進克泥日寨燒斃番酋姜錯太撫定了魯下密等處番夷嘉慶十九年中瞻對土司洛布七力劫掠鄰番抗捕傷兵二十年四川總督常明

提督多隆武領兵勦之恃險死拒重慶鎮總兵羅思舉力戰破其巢洛布七力
焚死分其地入上下瞻對泊咸豐中土司工布朗結爲人沈鷺兼并上下瞻對
之地欲擁康部全境以抗川拒藏鄰近各土司割地求免貢賦唯命至是藏人
怒求四川出兵秉章派遣員史致康率師會藏進討致康怯頓打箭鎗久藏番
需茶急馳兵克之殺工布朗結父子致康始逡巡至藏人索兵費銀十六萬兩
秉章未允藏人因據其地設官兵駐守光緒初丁寶楨爲四川總督以瞻對藏
官虐民往往激變每歲派員帶兵出關彈壓劉秉璋繼之稍寬縱藏官益驕橫
各土司多被威脅唯明正土司地大不之服頻年爭鬪十五年瞻對內訌逐藏
官乞內附秉璋不許唯治番官及亂民數人罪由藏易官且添駐堪布一人兵
八百名助守二十年朱窩章谷土司爭鬪滋事瞻對番官率兵越境干與開槍
傷我官兵四川總督鹿傳霖奏瞻對爲蜀門戶宜設法收回內屬派提督周萬
順知縣張繼率兵出關擊敗番兵不三月克瞻對並德爾格忒

即疊蓋堡
名保蓋堡全境

禽德格土司夫婦解至成都議并改設流官成都將軍恭壽憤傳霖不先會商

結駐藏大臣文海密奏劾傳霖翻原案復德格土司職仍以瞻對屬藏三十一年春駐藏大臣鳳全被戕於巴塘四川總督錫良奏請以四川提督馬維祺建昌道趙爾豐進討維祺率師先發先是泰凝寺產沙金錫良准商人採辦并派兵彈壓寺中喇嘛反抗殺都司盧鳴颺瞻對潛助其亂維祺出關討平之六月攻克巴塘擒正土司羅進寶副土司郭宗隆保誅之移其妻子於成都安置八月爾豐至殺堪布喇嘛及首惡數人祭鳳全維祺班師回爾豐接辦善後派兵剿倡亂之七村溝並搜捕餘匪因移師討鄉城次年閏四月克之並攻克稻壩貢噶嶺一律肅清於是爾豐建籌邊議錫良以聞朝廷特設督辦川滇邊務大臣授爾豐邊地在川滇甘藏青海間縱橫各四五百里土司居十之五餘地歸呼圖克圖者十之一清代賞藏者十之一流爲野番者十之三爾豐改巴塘裏塘地設治以所部防軍五營分駐之回川會商錫良派道員趙淵出關坐鎮三十三年爾豐護理四川總督奏准部撥開邊費銀一百萬兩三十四年授爾豐駐藏辦事大臣仍兼邊務大臣募西軍三營率之出關時德格土司爭襲構亂

久爾豐奏請往辦經泰凝道塢章谷倖倭麻書孔撒白利絨壩擦玉龍濯拉擴洛燥以至更慶十二月攻逆酋昂翁降白仁青等於贈科匪竄雜渠卡宣統元年四月攻雜渠卡五月戰於麻木六月追匪十日程至卡納一戰肅清改流其地並改春科高日兩土司地及靈葱土司之郎吉嶺村歸流十月四川兵入藏藏番扼察木多以西地阻之刦糧擄官爾豐率邊軍渡金沙江踰雪山抵察木多送川兵行於是三十九族波密八宿均請附邊轄三十九族者曰夥爾曰圖嘛魯曰吉甯塔克曰尼牙木查曰松嘛巴曰勒達克曰多嘛巴曰達爾羊巴曰他瑪曰夥兒曰拉寒他瑪夥兒拉寒三族共一土司曰夥耳曰瓊布噶曰瓊布色爾查曰瓊布納克魯曰扎瑪爾曰上阿扎曰下阿扎曰上奪爾樹曰下奪爾樹曰上剛噶爾曰下剛噶爾曰他瑪爾曰提瑪爾曰枳多曰哇拉枳多哇拉二族共一土司曰麻弄曰布川目桑曰書達格魯克曰奔盆曰策令畢魯曰色爾查曰納布貢巴曰結拉克汁曰拉巴曰三渣曰模模皆自爲部落設土總百戶或土百戶土百長等以治之歸駐藏大臣管轄爾豐以其族素恭順悉加慰遣因派兵剿類伍齊碩搬多洛

隆宗邊壩等阻路之番人又分兵取江卡貢覺桑昂雜瑜咸收服之二年邊軍直抵江達爾豐奏請以江達爲邊藏分界五月邊軍返察木多六月爾豐率兵略乍丫地八月巡阿足返設乍丫委員聞定鄉兵變派統領鳳山追勦九月三嚴野番投書索戰爾豐率兵赴貢覺十月派傅嵩林攻三嚴一旬而克十一月設三嚴委員十二月設貢覺委員爾豐旋返巴塘三年二月爾豐以巴塘所屬之得榮浪藏寺數年不服派兵攻克之設得榮委員並收服冷卡石三月爾豐調任四川總督四川布政使王人文繼之爲邊務大臣爾豐奏請人文未到任前以嵩林代理四月同發巴塘至孔撒麻書設甘孜委員檄靈葱白利倬倭東科單東魚科明正魚通各土司繳印改土歸流色達及上羅科野番來歸適駐藏大臣聯豫電請邊軍攻波密因奏派副都統鳳山率兵二千往應六月爾豐至瞻對藏官逃收其地設瞻對委員旋經道塢打箭鑪檄魚通卓斯各土司繳印改流爾豐入川沿途收咱里冷邊沈邊三土司印嵩林復出關改流泰凝而魚科土司結下羅科抗命嵩林令上羅科扼其險擊平之斃魚科土司於是嵩

林奏請設西康省而沃日崇喜納奪革伯咱巴底巴旺靈蔥上納奪各土司暨乍丫察木多兩呼圖克圖相繼繳印惟毛丫曲乞緩許之涼山夷獯獮者居甯遠越嵩峨邊雷波馬邊間淺山部落頭目屬於土司深入則涼山數百里皆夷地生夷黑骨頭爲貴種白骨頭者曰熟夷執賤役夷族分數百支不相統屬叛則出掠掠漢民作奴遇兵散匿清興雍正五年七年嘉慶十三年十六年迭經川吏勦撫加以部勒同治末越巽夷叛成都將軍崇實兼攝四川總督奏調貴州提督周達武率軍由陝回勦前鋒羅應旒出清溪撫大樹堡左右王嶺各土司進駐保安攻降治馬里阿波落跑馬坪燕麥廠遂克普雄石城夷地四百里間咸受約束官軍至靖遠刷茲林加布約尼錢交脚等支亦降更設靖遠新老兩營土千百戶出漢奴數萬迨爾豐經管關外朝廷以其兄爾巽督川爾巽欲悉平涼山夷以利邊務光緒三十四年八月派建昌鎮總兵鳳山建昌道馬汝驥等率兵暨民團勦寧遠吉狄馬加拉斯等支獯夷進至裏足山梁旋值國喪罷兵宣統元年正月令建昌鎮總兵田鎮邦甯遠府知府陳廷緒再舉征服淺

山白母子嗎噠拉施三合等支並收撫噶咱雞租五支別牛租租等支於是加拉及吉狄馬加等支先後降官軍進駐交脚收撫八切阿什並阿落馬家上三支下三支野夷悉請內附不隸土司先是馬邊夷阿侯蘇噶支戕英教士拒捕與馬邊協副將楊景昌軍相持爾巽調總兵董南斌往勦與寧遠軍夾擊阿侯蘇噶降兩軍於十月二十五日貫通涼山夷巢會於昨昨壩於是爾巽議禁黑夷蓄奴先就交脚設縣治餘地擇要屯守而西南山美姑河至雷波關雷寧通道四百餘里駐兵守護以通商旅是役也得地幾及千里夷衆凡十餘萬人二年振邦廷緒等師還討會理土司披砂會理村苦竹者保通安舟等悉改流至是川境土司多非舊觀矣今采傳世較永者著於篇其國初歸附未久旋即絕滅者尙不勝記云

成綿龍茂道松潘鎮轄

拈佐阿革寨土百戶係西番種類其先個個柘康熙四十二年歸附授職熱霧寨土百戶係西番種類其先甲楨他康熙四十二年歸附授職義眉喜寨

土千戶係保夷種類其先官布笑雍正四年歸附授職 毛革阿按寨土千戶

係保夷種類其先王乍雍正四年歸附授職 包子寺寨土千戶係西番種類

其先噶竹康熙四十二年歸附授職 以上松潘廳中營屬 阿思喇寨土千戶係西番種

類其先立架順治十五年歸附授職 羊喇寨土百戶係西番種類其先甲利

雍正二年歸附授職由四川總督給以土百戶委牌一張 以上松潘廳左營屬 下泥巴

寨土百戶係西番種類其先林青康熙四十二年歸附授職由四川總督給以

土百戶委牌一張 松潘廳右營屬 寒盼寨土千戶係西番種類其先占巴笑康熙四

十二年歸附授職 商巴寨土千戶係西番種類其先剛讓笑康熙四十二年

歸附授職 祈命寨土千戶係西番種類其先龍盼架康熙四十二年歸附授

職 羊喇踏藏寨土目係西番種類其先甲六笑康熙四十二年歸附授土目

阿按寨土目係西番種類其先六笑他康熙四十二年歸附授土目 挖藥

寨土目係西番種類其先且折笑康熙四十二年歸附授土目 押頓寨土目

係西番種類其先拈爭笑康熙四十二年歸附授土目 中岔寨土目係西番

種類其先捏盼目康熙四十二年歸附授土目 耶寨土目係西番種類其先
耶那亞康熙四十二年歸附授土目 竹白寨土目係西番種類其先札布吉
康熙四十二年歸附授土目 威咀寨土目係西番種類其先出亞康熙四十
二年歸附授土目 東拜王亞寨土目係西番種類其先點進笑康熙四十二
年歸附授土目 達弄惡壩寨土目係西番種類其先達喇笑康熙四十二年
歸附授土目 香咀寨土目係西番種類其先轄六康熙四十二年歸附授土
目 咨馬寨土目係西番種類其先由仲笑康熙四十二年歸附授土目 八
頓寨土目係西番種類其先革甲康熙四十二年歸附授土目 上包坐余灣
寨土千戶係西番種類其先札卜盼康熙四十二年歸附授職 下包坐竹當
寨土千戶係西番種類其先本布笑康熙四十二年歸附授職 川柘寨土千
戶係西番種類其先桑仲康熙四十二年歸附授職 谷爾壩那浪寨土千戶
係西番種類其先耶借康熙四十二年歸附授職 雙則紅凹寨土千戶係西
番種類其先耶那笑康熙四十二年歸附授職以上各土司皆頒有號紙 上

撒路木路惡寨土百戶係西番種類其先學賴雍正二年歸附授職 中撒路
木路惡寨土百戶係西番種類其先隆笑雍正二年歸附授職 下撒路竹弄
寨土百戶係西番種類其先迫帶雍正二年歸附授職 崇路谷謨寨土百戶
係西番種類其先札務革柱雍正二年歸附授職 作路生納寨土百戶係西
番種類其先耶刀雍正二年歸附授職 上勒四貢按寨土百戶係西番種類
其先借勒雍正二年歸附授職 下勒四卜頓寨土百戶係西番種類其先林
革秀雍正二年歸附授職 以上各土司皆頒有印信號紙 班佑寨土千戶
係西番種類其先獨足笑雍正元年歸附授職 巴細蛇住壩寨土百戶係西
番種類其先連柱笑雍正元年歸附授職 阿細柘弄寨土百戶係西番種類
其先哈情雍正元年歸附授職 上作爾革寨土百戶係西番種類其先轄頓
雍正元年歸附授職 合壩奪雜寨土百戶係西番種類其先谷六笑雍正元
年歸附授職 轄漫寨土百戶係西番種類其先額旺雍正元年歸附授職
下作革寨土百戶係西番種類其先耶納他雍正元年歸附授職 物藏寨土

百戶係西番種類其先郎加蚌雍正元年歸附授職 熱當寨土百戶係西番
種類其先拆戎架雍正元年歸附授職 磨下寨土百戶係西番種類其先的
那雍正元年歸附授職 甲凹寨土百戶係西番種類其先革柯雍正元年歸
附授職 阿革寨土百戶係西番種類其先甲亞雍正元年歸附授職 鵠個
寨土百戶係西番種類其先羅六雍正元年歸附授職 郎脩寨土百戶係西
番種類其先阿山雍正元年歸附授職 上阿壩甲多寨土千戶係西番種類
其先拆達架雍正元年歸附授職 中阿壩墨倉寨土千戶係西番種類其先
革杜亞雍正元年歸附授職 下阿壩阿強寨土千戶係西番種類其先頓瑞
雍正元年歸附授職 上郭羅克車木塘寨土百戶係西番種類其先噶頓康
熙六十年歸附授職 中郭羅克插落寨土千戶係西番種類其先丹增康熙
六十年歸附授職 下郭羅克納卡寨土百戶係西番種類其先彭錯康熙六
十年歸附授職 上阿樹銀達寨土百戶係西番種類其先卜架亞康熙六十
年歸附授職 中阿樹宗個寨土千戶係西番種類其先卜他康熙六十年歸

附授職 下阿樹郎達寨土百戶係西番種類其先郎加割舍康熙六十年歸

附授職 小阿樹寨土百戶係西番種類其先達爾吉康熙六十年歸附授職

以上松潘屬 丟骨寨土千戶係西番種類其先沙乍謨康熙四十二年歸附

授職 雲昌寺寨土千戶係西番種類其先革都判康熙四十二年歸附授職

呷竹寺土千戶係傈夷種類其先七谷康熙四十二年歸附授職

以上松潘屬 以上各土司皆頒有號紙 中羊峒隆康寨首係西番種類其先林柱雍

正二年歸附委以寨首咸豐十一年歐利娃作亂陷南坪營同治四年周達武

率武字果毅各軍討平之 下羊峒黑角郎寨首係西番種類其先六孝雍正

二年歸附委以寨首以上各土司皆無印信號紙

以上松潘屬南坪營屬

大姓寨土百

戶其先郁氏於唐時頒給左都督職銜印信管束番衆順治六年郁孟賢將唐

時印信呈繳 小姓寨土百戶其先郁從文於明末歸附授長官司職銜印信

管束番衆順治年間將明時印信號紙呈繳 大定沙壩土千戶其先蘇忠於

明萬歷年間歸附授土千戶職銜印信管束番衆順治年間將明時印信號紙

早繳以上各土司皆頒號紙 大黑水寨土百戶其先郁孟賢於明末歸附授
土百戶職銜管束各番順治年間將明時號紙呈繳 小黑水寨土百戶其先
於唐時歸附授土百戶職銜印信管束各番順治年間郁從學將唐時印信呈
繳以上各土司皆給委牌 松坪寨土百戶其先韓騰於明末歸附授土百戶
職銜印信管束番衆順治年間將明末印信號紙呈繳仍頒給號紙以上茂州
疊溪營屬
靜州長官司其先董正伯自唐時歸附授職順治年間賊屠茂州土司董懷德
率土兵捍禦地方寧謐九年董應詔歸附 隴木長官司其先何文貴於宋時
勦羅打鼓生番有功授職與印順治九年歸附 岳希長官司其先坤蒲自唐
時有功授職康熙九年歸附 沙壩安撫司其先蟒答兒自明時勦黑水三溪
生番有功授職順治九年歸附 水草坪巡檢土司其先蟒答兒次子住水草
坪授巡檢職順治九年歸附 竹木坎副巡檢土司其先坤兒布自明時授職
順治九年歸附 牟托巡檢土司其先煤沙自唐時授職順治九年歸附以上
各土司皆頒印信號紙 實大關副長官司其先官之保自明時授職康熙十

年歸附頒給號紙

以上茂州
茂州營屬

陽地隘口土長官司始祖王行儉由宋寧宗朝授龍州判官世襲傳三世改守

禦千戶元至正間授宣禦副使明洪武七年開龍州改長官司順治六年王煊

歸附仍授原職頒給印信號紙 土通判明洪武七年授王思恭爲長官司以

王思民襲判官旋授宣撫僉事嘉靖間改土通判順治六年王啟睿歸附仍授

原職頒給號紙無印信 龍溪堡土知事宋景定間授薛嚴龍州知州世襲明

隆慶間改土知事順治六年薛兆選歸附仍授原職頒給號紙

以上龍安府
龍安營屬

瓦寺宣慰司先世雍中羅洛思與兄桑郎納思壩前明納貢土物正統六年威

茂孟董九子黑虎等寨諸番跳梁雍中羅洛思桑郎納思壩奉調出藏帶兵出

力即留住汶川縣塗禹山給宣慰司印信號紙順治九年土司曲翊仲歸附授

安撫司康熙五十九年征西藏土司桑郎溫愷隨征有功加宣慰司銜乾隆二

年加指揮使職銜乾隆十七年及三十六年征勦雜谷土司蒼旺並金川等處

土司桑郎雍中隨征出力賞戴花翎嘉慶元年隨征達州教匪經四川總督勒

保奏升宣慰司換給印信號紙

以上理番廳
州協左營屬

梭磨宣慰使司始祖囊素沙

甲布原係雜谷土目自唐時歸附雍正元年征勦郭克賊番有功頒給副長官

司印信號紙乾隆十五年換給安撫司印三十六年進勦大小金川土司隨征

經將軍阿桂奏賞宣慰司職銜並花翎換給印信號紙卓克基長官司其祖

良爾吉係雜谷土舍乾隆十三年隨征大金川有功十五年頒給長官司印信

號紙尋以通匪伏誅松岡長官司其祖係雜谷土目自唐時安設康熙二十

二年頒給安撫司印信號紙乾隆十七年土司蒼旺不法伏誅黨壩長官司

其曾祖阿不係雜谷土舍乾隆十三年土舍澤旺隨征大金川有功頒給長官

司印信號紙嘉慶元年土司更噶斯丹增姜初隨征苗匪賞花翎

以上理番廳
州協右營

成綿龍茂道提標轄

沃日安撫司始祖巴碧太順治十五年歸附頒發沃日貫頂淨慈妙智國師印

信號紙乾隆二十年頒給土司色達拉安撫司印信號紙隨將舊印呈繳二十

九年隨征金川有功賞二品頂戴花翎沃日地名更為鄂克什原係維州協所

轄乾隆五十年改隸懋功協管轄宣統三年改流 綽斯甲布宣撫司

綽斯甲布印文

曰卓斯甲布卓斯地名甲者家之誤番人稱謂如德格則曰德格家
孔撤則曰孔撤家布者番人男子之稱印以綽斯甲布為名誤矣 始祖資立

康熙三十九年歸附四十一年頒給安撫司印信號紙乾隆三十七年出師金

川賞二品頂戴花翎四十一年頒給宣撫司印信號紙隨將舊印呈繳原係阜

和協所轄乾隆五十一年改隸懋功協管轄宣統三年改流

以上懋功屬懋功協屬

建昌道建昌鎮轄

河東長官司其先自元迄明世襲建昌宣慰司順治十六年安泰寧歸附呈繳

明印雍正六年改授長官司管有 大石頭 長村 繼事田三土百戶 利

扼 上芍菓 阿史 紐姑 上沈渣 下芍菓 上熱水 小涼山 墓西

又利呢 阿史 者加十二土目 阿都正長官司其先結固順治六年歸

附授職康熙四十九年土司慕枝為招撫案內授阿都宣撫司頒給印信號紙

雍正六年改土歸流是年涼山野夷不法土司聚姑擒獻兇首復授阿都正長

官司管有 歪歪溪 咱古 喬山南 大河西四土目 副長官司雍正六

年勦撫涼山夷衆歸附有功授阿都副長官司管有 小涼山馬希 大梁山

拖覺 阿乃 又阿史 結呢 派乃 者膩 那科 那俄 哈乃過 又

阿驢十一土目 沙罵宣撫司其先安章威康熙四十九年歸附授職管有

那多 扼烏 咱烈山 撒凹溝 結覺五土目

以上西昌縣中營屬

昌州長官司其

先盧尼古明洪武九年調守德昌昌州康熙四十九年歸附承襲 普濟州長

官司其先吉三嘉明洪武七年授普濟州土知州康熙四十九年歸附承襲改

長官司 威龍州長官司其先張起朝明洪武七年授職順治十六年歸附世

襲

以上西昌縣左營屬

河西宣慰司其先安吉茂康熙五十一年歸附五十七年吉茂

歿無子嶺氏撫伊兄越嶺土司嶺安泰之子爲子更名安祥茂雍正六年改土

歸流換給土千總職銜世襲管有 囉慕 芍菓 咱堡 沙溝四土目

以上西昌縣屬

以上各土司皆頒印信號紙

印部宣撫司其先嶺安盤康熙四十三年歸附授職同治二年土司嶺承恩助

官軍禽石達開有功賞二品銜管有 膩乃 阿谷 蘇呷 咱戶 慕唐

阿蘇 濫田壩 普雄 黑保 大疏山十土目 以上越嵩屬 煖帶密土千

戶其先嶺安泰康熙四十九年歸附授職管有 上官 六革 瓜裸 糾米

布布 阿多六磨 磨卡爲呷 西糾七鄉總 煖帶田壩土千戶其先部

則康熙四十四年歸附授職 松林地土千戶其先王德洽康熙四十九年歸

附授職管有 老鴉漩 白石村 六翁 野猪塘 前後山 料林坪六土

百戶 以上越嵩屬 以上各土司皆頒印信號紙

木裏安撫司其先六藏塗都雍正七年歸附 瓜別安撫司係麼麼夷人其先

玉珠迫康熙四十九年歸附 馬喇副長官司係攏夷人其先阿世忠康熙十

九年歸附頒給號紙 古柏樹土千戶係麼麼夷人其先郎俊位康熙四十九

年歸附管有 阿撒 祿馬六槽兩土目 中所土千戶係麼麼夷人其先喇

瑞麟康熙四十九年歸附 左所土千戶係麼麼夷人其先喇世英康熙四十

九年歸附管有 華苴蘆土目 右所土千戶係麼麼夷人其先八聖康熙四

十九年歸附 前所土百戶係麼麼夷人其先阿成福康熙四十九年歸附

後所土百戶係麼麼夷人其先白馬塔康熙四十九年歸附

以上鹽源縣會豐營屬

以上

各土司皆頒印信號紙

蘇州土千戶其先姜喀康熙四十九年歸附授職 架州土百戶其先里五康

熙四十九年歸附授職 苗出土百戶其先熱即巴康熙四十九年歸附授職

大村土百戶其先也四噶康熙四十九年歸附授職 糯白瓦土百戶其先

紐昨康熙四十九年歸附授職 大鹽井土百戶其先前布汪喀康熙四十九

年歸附授職 熱即哇土百戶其先牙卓嫩康熙四十九年歸附授職 中村

土百戶其先歪即噶康熙四十九年歸附授職 三大枝土百戶其先甲噶康

熙四十九年歸附授職 河西土百戶其先那姑康熙四十九年歸附授職

以上

雲南縣屬

窩卜土百戶其先藍布甲噶康熙四十九年歸附授職 虛邱土

百戶其先濟布康熙四十九年歸附授職 白路土百戶其先倪姑康熙四十

九年歸附授職 阿得轎土百戶其先募庚康熙四十九年歸附授職 瓦都

土目其先安承裔康熙四十九年歸附授職 木朮四土目其先那咱康熙四十九年歸附授職 瓦尾土目其先瀘沽康熙四十九年歸附授職 瓦都木朮四瓦尾三土司皆於雍正五年因征三渡水獐梭違誤運糧參革其部落戶口仍設土目管束以上屬寧縣靖遠營屬 七兒堡土目原設土司康熙四十九年歸附授職雍正五年降土目管有 耳挖溝土目屬寧縣靖遠營屬 以上各土司皆頒印信號紙

黎溪舟土千戶其先自必仁康熙四十九年歸附授職 迷易土千戶其先安文康熙四十九年歸附授職以上各土司皆頒有印信號紙 會理村土千戶其先祿沙克康熙三十二年歸附授職頒給號紙 者保土百戶其先祿阿格康熙四年歸附無印信號紙 普隆土百戶其先汪玉康熙四十九年歸附承襲 紅卜苴土百戶其先刁氏康熙四十九年歸附承襲以上各土司皆頒有印信號紙 苦竹壩土百戶其先祿姐康熙三十七年歸附承襲頒給印信號紙其通安舟土百戶另給鈐記以上會理州會川營屬 披砂土千戶其先祿應麟康熙

四十九年歸附頒給號紙

會理州永
定營屬

祿氏五土司傳二百餘年宣統初祿紹

武死無後妻自氏據其遺產祿自兩姓羣起爭襲作亂二年趙爾巽派兵剿捕先後擒逆首祿禎祥嚴如松等因移師討爐鐵梁子侯夷悉平之披砂會理村苦竹者保通安舟五土司地一律收回改流設治

建昌道提標轄

天全六番招討司高躋泰順治九年歸附副司楊先柱同均於雍正六年追繳印信號紙以其地爲天全州 穆坪董卜韓則宣慰使司其先於明世襲土職至康熙元年堅參喃喀歸附仍授原職請領宣慰司印信乾隆十年頒給號紙

天全州
雅營屬

黎州土百戶漢馬岱後其先馬芍德於明洪武八年世襲安撫司萬曆十九年馬祥無子妻瞿氏掌司事與祥姪構殺降千戶順治九年馬高歸附仍授原職乾隆十七年改百戶大田副土百戶乾隆十七年因防曲曲烏奏請添設副土百戶一員世襲 松坪土千戶其先馬比必康熙四十三年歸附授職

以上清
溪縣案

雅屬 以上各土司皆頒有印信號紙

沈邊長官司原籍江西吉水縣其先余錫伯前明從征來川授土千戶順治九年余期拔歸附改名永忠宣統三年改流 冷邊長官司西番瓦布人其先阿

撒卍順治元年歸附傳至周至德於康熙六十年授職宣統三年改流

以上打箭爐

事 明正宣慰使司其先係木坪分支明洪武初始祖阿克旺嘉爾參隨征

明玉珍有功永樂五年授四川長河西甯魚通宣慰使康熙五年丹怎札克巴

歸附乾隆三十六年甲木參德侵隨征金川有功賞賜佳穆伯屯巴名號並二

品頂戴花翎五十六年甲木參諾爾布隨征廓爾喀賞花翎嘉慶十四年甲木

參沙加領班進京恭祝萬壽賞花翎世襲住牧打箭鎮城光緒三十四年七月

趙爾豐奏改打箭鎮爲康定府設河口縣宣統三年土司甲木參瓊珀繳印其

地悉歸流原管有 咱哩木千戶 木噶 瓦七 俄洛 白桑 惡熱 下

八義 少悞石 作蘇策 八哩籠 上渡噶喇住索 中渡啞出卡 他咳

索窩籠 惡拉 樂壤 扒桑 木體 格窪卡 呷那工弄 吉增卡桑

阿籠 沙卡 上八義 拉里 八烏籠 姆朱 上渣壩惡疊 上渣壩卓
泥 中渣壩熱錯 中渣壩沱 下渣壩業窪石 下渣壩莫藏石 魯密東
谷 魯密普工礮 魯密郭宗 魯密結藏 魯密祖卜柏哈 魯密初把
魯密昌拉 魯密堅正 魯密達媽 魯密格桑 魯密本滾 長結杵尖
長結松歸 魯密白隅 魯密梭布 魯密達則 魯密卓籠四十八土百戶
革伯咱安撫司其先魏珠布策凌康熙三十九年歸附授職頒給印信號紙
宣統三年改流 巴底宣慰司其先綽布木凌康熙四十一年歸附授巴底安
撫司宣統三年改流 巴旺宣慰司與巴底土司同世系分駐巴旺共管地方
土民宣統三年改流 喇嘎安撫司其先阿倭塔爾康熙四十年歸附授職
霍耳竹窩安撫司即倭倭其先索諾木袞卜雍正六年歸附授職宣統三年改
流原管有 瓦述寫達 瓦述更平東撒兩土百戶 霍耳章谷安撫司其先
羅卜策旺雍正六年歸附授職光緒二十年瞻對欲奪其地鹿傳霖派兵滅瞻
對同倭倭一并改流後發還而章谷無人承領改爲鎭霍屯宣統三年改流

納林沖長官司其先諾爾布雍正六年歸附授職與章谷土司一家 瓦述色他長官司雍正六年歸附授職 瓦述更平長官司雍正六年歸附授職 瓦述餘科長官司其先沙克嘉諾爾布雍正六年歸附授職 霍耳孔撤安撫司其先麻蘇爾特親雍正六年歸附授職宣統三年改流管有 科則 圖根滿磔兩土百戶 霍耳甘孜麻書安撫司其先那木卡索諾木雍正六年歸附授職宣統三年改流原管有 革賚 束暑 又束暑三土百戶 德爾格忒宣慰司其先丹巴策凌雍正六年歸附授德爾格忒安撫司十一年改宣慰司諸土司部落以德格爲最大東連瞻對西連察木多南連巴塘北連西甯番人以其地大有天德格地德格之稱鹿傳霖派兵攻瞻對時訪得德格土司羅追彭錯妻玉米者登仁甲生子名多吉僧格又與頭人通生子名降白仁青以是與夫反目玉米者登仁甲本藏女於瞻對藏官有姻誼藏官助之抗其夫故各攜其子分居焉光緒二十年官軍計誘羅追彭錯言爲之逐其婦及降白仁青因入德格洎傳霖被劾罷改流讓土司夫婦旋病故傳霖奏遺其二子回籍多吉

僧格暫管地方降白仁青已爲僧繼而招致多人爭職多吉僧格奔藏德格頭人百姓以降白仁青非土司子且殘暴迎多吉僧格歸降白仁青避位數年頭人正巴阿登等嗾其再起爭職并誘佔多吉僧格之妾多吉僧格夫婦復奔藏控於駐藏大臣有泰張蔭棠旣而德格百姓復迎之歸錮降白仁青降白仁青脫出衆黨作亂人民多被殺戮多吉僧格遣人至打箭鑪告急宣統元年四月趙爾豐率兵討之降白仁青敗逃入藏多吉僧格夫婦請改流爾豐不欲利其危亂許以復職多吉僧格泣曰德格地廣人稀窺伺者衆終恐不自保願招漢人開墾使地闢民衆乃可圖存意極堅決爾豐奏分其地爲五區中區德化州南區白玉州北區登科府極北一區即石渠縣西區則同普縣而邊北道駐登科焉多吉僧格納其財產於官徙家巴塘復以奏給養贍銀及其妻姒郎錯莫首飾捐助巴塘學費爾豐奏賞頭品頂戴并予其妻建坊原管有 四上革賚雜竹嗎竹卡 籠壩六土百戶 霍耳白利長官司其先隆溥特查什雍正六年歸附授職宣統三年改流 霍耳咱安撫司其先阿克旺錯爾恥木雍正

六年歸附授職管有 兩下革賚土百戶 霍耳東科長官司其先達罕格努
雍正六年歸附授職宣統三年改流 春科安撫司其先袁卜旺札爾雍正六
年歸附授職副土司與安撫司一家同時歸附授職宣統元年改流 高日長
官司其先自印布雍正六年歸附授職宣統元年改流 蒙葛結長官司其先
達木袞布雍正六年歸附授職 林蔥安撫司其先袁卜林親雍正六年歸附
授職宣統三年改流 上納奪安撫司其先索諾木旺札爾雍正六年歸附授
職宣統三年改流原管有 上納奪土千戶 上納奪黎窩 上納奪 納奪
黎窩三土百戶 瞻對有上中下三名上瞻對茹長官司下瞻對安撫司均雍
正六年歸附授職中瞻對長官司乾隆十年授職距打箭鎗七日程東連明正
南接裏塘西北與德格土司毘連縱橫數百里爲鴉龍江之上游同治初川藏
會攻瞻對川軍未至藏兵先克瞻對派民官一僧官一率兵駐守由達賴喇嘛
及商上選任咨請駐藏大臣奏明每三年替換藏官恣行暴政誅求無厭瞻對
民不堪命屢起抗官疆吏率加壓服仍令屬藏光緒二十年鹿傳霖討平瞻對

議改流卒爲恭壽文海劾罷三十四年趙爾豐由川赴德格關外土司百姓沿途控告瞻對藏官侵奪土地四出虐民并歷訴中朝兩次將瞻對歸藏時藏官追究內附者一一孥戮之慘藏官不自安陰欲添兵攻爾豐爾豐令傅嵩林率兵赴昌泰扼之宣統元年春爾豐建議收瞻對樞府令駐藏大臣聯豫溫宗堯與藏人議贖未成樞臣恐牽動外交持不斷於是爾豐與嵩林議決以計取之三年夏爾豐調任入川偕嵩林整兵經瞻對藏官憚軍勢之盛潛遁去瞻人歡舞出迎因收回設治尋爾豐至川奏聞

以上打箭爐廳阜和協屬

以上各土司均頒有印信

號紙

裏塘宣撫司其先番目江擺康熙五十七年歸附授職傳至索諾木根登因不能約束帳下頭人雲甸等致滋事端革去土職以土都司希洛工布拔補

裏塘巴塘

兩土司例於頭人內揀補與他土司不同

嘉慶十二年希洛工布爲竹馬策登等所害以頭人阿策

拔補頒給印信號紙副土司其先番目康卻江錯與正土司同時歸附雍正七年授職嘉慶八年土司羅藏策登爲正土司頭人雲甸等戕害以頭人阿彩登

舟拔補頒給印信號紙向設守備一把總一光緒三十一年川軍討巴塘亂髮塘頭人不支烏拉糧餉不能轉運趙爾豐誅頭人正土司逃往稻壩貢噶嶺噶聚土人爲亂爾豐移師攻鄉城分兵先勦稻壩正土司敗逃入藏稻壩平先是鄉城喇嘛普中札娃强悍知兵誘殺裏塘守備李朝富父子鹿傳霖派游擊施文明討之爲所擒剝皮實草懸以爲號三十二年正月爾豐率兵督攻大小數十戰匪退喇嘛寺死守爾豐圍之數月斷其水道普中札娃自縊諸番皆降改裏塘爲順化縣三十四年秋復改裏化同知以鄉城爲定鄉縣稻壩爲稻城縣貢噶嶺設縣丞 瓦述毛丫長官司其先番目索郎羅布康熙六十一年歸附雍正七年授職 崇喜長官司其先番目杜納台吉康熙六十一年歸附雍正七年授職 瓦述曲登長官司其先番目康珠康熙六十一年歸附雍正七年授職 瓦述噶隴長官司嘉慶十二年歸附授職以上各土司皆頒有印信號紙 瓦述茂了土百戶其先番目側冷工康熙六十一年歸附雍正七年授職 瓦述麻里土百戶嘉慶十二年歸附授職以上各土司皆頒有號紙

以上裏塘
後略對

巴塘宣撫司其先羅布阿旺康熙五十八年歸附授職頒給印信號紙副土司同由四川設糧員一都司一千總一三年更替其喇嘛寺設堪布一鐵棒一爲僧官亦三年另換堪布掌管教務經典鐵棒管理僧人條規番人犯罪土司治之番人之喇嘛犯罪鐵棒治之土餉以賦相抵不足由官補給年約銀千餘兩光緒三十年駐藏幫辦大臣鳳全赴任道經巴塘見地土膏腴即招漢人往墾築墾場於茨梨隴委巴塘糧員吳錫珍都司吳以忠兼理番人驚沮土司堪布勸鳳全速入藏不聽三十一年春七村溝番民衆衆劫殺墾夫吳以忠陣亡鳳全避入正土司寨與亂民議和亂民迫鳳全回川許息事鳳全信之東行數里至鸚哥嘴被殺夏馬維騏趙爾豐往討六月十八日克巴塘誅兩土司并堪布喇嘛及首惡數人爾豐搜勦餘匪因移師定鄉城三十二年秋爾豐會錫良暨雲貴總督丁振鐸具奏改流設巴安縣三十四年改巴安府分設鹽井縣三壩通判並設康安道駐巴塘原管有 上臨卡石 下臨卡石 岡裡 桑隆

上阿蘇 下阿蘇 郭布等七土百戶

巴塘糧務屬

嶺夷十二地夷人頭目嘉慶十三年歸附給有頭目牌十六年改流更姓住牧

豹嶺岡姓高 趕山坪姓澤 阿葉坪姓惠 牛跌蠻姓周 芭蕉溝姓華

龍竹山姓夏 雪都都姓萬 小板屋姓年 牛心山姓海 月落山姓字

鹽井溪姓成 桃子溝姓平 赤夷十三支嘉慶十三年歸附選拔土弁給

有委牌住牧 瞻巴家土千總一土把總一管有 參雞疎 卑溪疎 麥哈

疎 白魁四家 哈納家土千總一土把總一管有 冒扭 雅札 哈什三

三家 蜚瓜家土千總一土把總二管有 媽 呆得二家 魁西家土千總

一土把總一凡各地支所部猓夷稱曰娃子

以上數邊蠻致
邊營冷噴汛屬

川東道重慶鎮轄

石砭宣慰使其先馬定虎漢馬援後南宋時封安撫使其後克用明洪武初加
封宣撫使崇禎時土司千乘及婦秦良玉以功加太子太保封忠貞侯子祥麟
亦加封宣慰使順治十六年祥麟子萬年歸附仍授宣慰使職乾隆二十一年
以夔州府分駐雲安廠同知移駐石砭二十五年設石砭直隸廳改土宣慰使

爲土通判世職不理民事

夔州府夔州協屬

西陽宣慰使司其先受明封傳至奇鍾

於順治十五年歸附仍授原職頒給印信號紙雍正十二年土司元齡因事革

職以其地改設酉陽直隸州原管有 邑梅峒 平茶峒 石耶峒 地壩四

長官司均於乾隆元年改流

重慶府綏寧營屬

永寧道提標轄

九姓土長官司其先任福江南溧陽人明洪武初從傅友德入蜀招撫撓羿蠻

受封傳至孟麟以功擢安撫使天啓元年土司任世藩夫婦死難子祈祿復以

功授瀘衛守備傳至長春順治四年歸附更給知府劄副吳三桂叛長春來奔

十六年復永甯長春子功臣復率士民歸附頒發劄副康熙二年江安縣賊吳

天成等作亂功臣以擒賊功議敘子宗頊襲職隨頒土長官司印信號紙以武

職屬瀘州州判及瀘州營管轄嘉慶元年移駐瀘衛光緒三十四年趙爾豐奏

改瀘衛爲古宋縣存土司名

瀘州瀘州營屬

千萬貫土千總其先自元時受封明洪武四年賜姓楊康熙四十三年土司楊

喇哇歸附頒給印信號紙其後楊明義於雍正六年因雲南米貼夷滋事案參

革子明忠立功贖罪賞土千總職銜未經請頒印信號紙管有頭目六十五名

千萬貫土千戶其先楊繼武爲土千總楊成胞叔嘉慶七年夷人滋事繼武

同成出力賞給土千戶執照 千萬貫土巡檢其先安濟明時授馬湖土知府

其後失職復授土巡檢雍正六年土舍安保歸附無印信號紙管有頭目二十

四名

以上雷波廳
昔安營屬

黃螂土舍其先爲明時酋長雍正五年土舍國保歸附無

印信號紙凡千萬貫黃螂四土司所管黑白骨頭二種猓夷椎髻衣氍耕種打

牲爲業

以上雷波廳
安阜營屬

平彝長官司其先王元壽原籍江南人於明時受封順

治九年土司王長才歸附 蠻彝司長官司其先文的保原籍湖廣人於明時

受封順治九年土司文鳳鳴歸附 泥溪長官司其先王麒自明時世襲順治

九年土司王嗣傳歸附 沐川長官司其先於明時受封賜姓悅順治九年土

司悅曉瞻歸附以上各土司皆頒有印信號紙

以上屏山縣
屏山汛屬

明州樂土百戶

其先益甲涼山生夷其後駱哥康熙四十二年歸附授職 油石洞土百戶其

先普祚涼山生夷子咀姑康熙四十二年歸附授職 旁阿姑土百戶其先脚
謨伯涼山生夷子駱束康熙四十二年歸附授職 大羊腸土百戶其先六盃
涼山生夷子紐車康熙四十二年歸附授職 賦乃巢土百戶其先必祚涼山
生夷子脚骨康熙四十三年歸附授職 以上馬邊廳馬邊營州峽州屬 挖黑土百戶其先亦
赤涼山生夷子三兒康熙四十二年歸附授職 阿招土百戶其先阿直涼山
生夷子秧哥康熙四十二年歸附授職 幹田壩土百戶其先賒的涼山生夷
子路引康熙四十二年歸附授職 蘇柳壩土百戶其先鄂車涼山生夷子六
貴康熙四十二年歸附授職以上各土司皆領有號紙 檄栗坪土千戶其先
卜佐涼山生夷其後阿二嘉慶十三年歸附賞給職銜領有委牌 冷紀土外
委其先普祚涼山生夷子未鐵雍正元年歸附授職 以上馬邊廳馬邊營三河口州屬 以上
各土司外有理番廳之雜谷腦屯乾堡寨屯上孟董屯下董孟屯九子寨屯懋
功廳之懋功屯崇化屯撫邊屯章谷屯綏靖屯等土弁各設屯守備暨所屬屯
千總屯把總屯外委均世及接頂與地志兵志互見